

**This September call Australia, China, India, Malaysia & Philippines**

Use your Telikom Prepaid Land line, Fixed Wireless Phone and Clifon.

for only **39¢ ANYTIME**



24/7 Customer Care: Call 345 6789 or www.telikompng.com.pg



AIRLINES PNG: Gat nem long lokol sevis

# Gavman tok nogat man bai lusim wok ...sapos Air Niugini na Airlines PNG i marit

WANPELA wik bihain long Praim Minista Peter O'Neill i tokaut long tok orait gavman i givim long marit bilong Air Niugini na Airlines PNG, Minista bilong Stet Entaprais, Sir Mekere

Morauta, i tok klia olsem nogat wok-manmeri long dispela tupela bisnis bai lusim wok. Las wik Fonde, Mista O'Neill, na Sir Mekere, i bin tokaut olsem Nesenel Ek-

sektiv Kaunsil (NEC) i bin givim tok orait bilong en, long kirapim wok long sekim strong bilong marit namel long bikpela balus kampani bilong kantri, Air Niugini, na Airlines PNG.

Oli tok marit bilong tupela balus kampani bai lukim moa balus ron na sevis i go moa long ol liklik ples we planti long ol pipel bilong yumi i stap long en. *I go moa long pes 2*

**Insait** Somare tok lukaut – P3  
KOMENTRI: Luksave bilong sevis, na birua bilong winmani – P13

**WINIM SAMPLA LO K200,000 INDEPENDENCE FRI KREDIT**

Yusim Digicel fon blo yu na u inap go insait lo resis lo Winim Fri Kredit!



SCAN ME FOR INFO

Yusim Digicel mobail blo yu long mun septemba na yu nap winim fri kredit. Planti Fri Kredit lo winim! Ofa bai pinis lo 30 septemba 2011.

**Digicel**

Digicel Terms na kondisen i stap insait pinis.



**GLOBE**  
...the perfect choice  
**VITAMIN ENRICHED**

More Easy, More Tasty, More Healthy.



# Tingting bilong gavman:

**Nau i gat: 32 ples i gat balus sevis i go long en. Pastaim long krismas: 126 ples bilong kisim balus bai karim pasindia i go kam.**

**Epril 2012: 169 moa eastrip bai lukim sevis Ogas 2012: 328 siti, taun na ples bai gat balus sevis i ron.**

## Long Air Niugini:

**Nau i gat: 21 balus.**

**Bihain long marit: Em bai gat 33 balus. 12-pela Dash balus bilong Airlines PNG bai go long Air Niugini.**

# Gavman tok nogat man bai lusim wok...

## Ikam long pes 1

"Bikpela hap bilong ol pipel bilong yumi i stap long ol longwe bus ples, na ol i save sindaun long mobail fon na balus sevis long kisim toksave. Sindaun na laip bilong ol i no inap kamap gut sapos i nogat balus i ron i go painim ol. Air Niugini i save lukluk moa long ol bikpela ron bilong balus, na em i no inap long go moa long ol liklik ples, we planti moa manmeri i stap long en," Mista O'Neill i tok.

Sir Mekere i tok klia olsem gavman i nogat inap mani long opim sevis bilong Air Niugini i go long moa liklik ples.

"Dispela em i wanpela

pablik praivet patnasip, na i no tok nating. Sapos ol i bung, Air Niugini na Airlines PNG bai halivim bisnis bilong ol yet na ol bai inap givim sevis i go long ol pipel i nidim, na gavman bai no inap wari long givim mani oltaim long ol," Sir Mekere i tok.

Mista O'Neill i bin tok klia olsem dispela marit bai no inap lukim ol wokmanmeri bilong tupela bisnis i lusim wok bilong ol.

"Sapos ol i sanap ol yet, Air Niugini na Airlines PNG bai no inap groim bisnis bilong ol. Tasol wantaim, bai yumi lukim namba bilong wok bai go antap. Bai nogat wanpela wok i lus. Mi givim dispela

tok klia long olgeta wokmanmeri bilong Air Niugini na Airlines PNG. Wok bai go antap, na bai gat moa sans bilong promosen na trening," em i tok.

Tasol wanpela samting tupela lida i no tokaut klia long en, em long prais bilong balus tiket bihain long tupela kampani i bung.

Mista O'Neill i tokaut olsem ol mausman bilong tupela balus kampani bai stap insait long wanpela Merger Implimentesen Opis wantaim ol teknikal saveman na ol lain i ken skelim velu bilong ol bisnis, long sekim sapos dispela marit bai gutpela o nogat.

# Hotel projek i popaia

**BIKPELA hotel na laki ples projek we i wok long kamap long Boroko long Pot Mosbi, nau i gat tenpela de tasol long save sapos em bai go het yet o nogat.**

Minista bilong Komes na Industri, Charles Abel, i tokaut long Tunde dispela wik, olsem gavman i givim ol divelopa bilong projek, CMSS (PNG) Ltd, bilong Saut Korea, tenpela de long tok stret sapos em i ken pinisim projek o nogat.

Insait long dispela tenpela de, sapos CMSS i no kam bek long gavman, bai ol i lusim kontrak bilong ol long dispela projek.

Mista Abel i tok divelopa i mas pruvim olsem em i ken pinisim projek bihainim ol agrimen, ol i mekim wantaim tupela Kutubo wel papgraun kampani.

Petroleum Resources Gobe (PRG) na Petroleum Resources Moran (PRM) i bin tromoi K11 milian wan wan long baim 5% ekwiti long projek.

Mista Abel i tok aninit long agrimen, gavman i bin makim taim bilong dispela projek long pinis.

"Divelopa i bin tok em i ken sanapim hotel insait long taim em yet i makim. Bihain long 12-pela mun, mipela i no lukim wanpela samting i kamap, bihainim projek

agrimen," Abel i tok.

Em i tok klia olsem moa long K33 milian i lus pinis long projek. Gavman i bin givim 10 yia takis malolo long kampani long kirapim dispela projek.

Mista Abel i tokaut tu olsem i gat askim i go pinis long gavman long ol arapela kontrakta husat tok ol i ken pinisim dispela projek. Nau, gavman i wetim tasol CMSS long tok klia.

Dispela hotel na kasino (pilai laki) projek i pulim planti kain kros long ol komyuniti grup na sios, olsem dispela projek bai kamapim moa hevi long ol famili long kantri.



**GUTPELA RAUN WANTAIM COMFORT TAXIS:** Wanpela long ol teksi kampani long Mosbi siti, Comfort Taxis, i bin lain long Unagi Pak (Park) long Gordons long dispela wik Mande. Nau ol i gat ol Honda CRV long go wantaim ol Toyota Kraun teksi bilong ol. Dispela ol Comfort Taxi i gat ol teksi hud we i save edvataisim Citifon, em mobail telefon bilong PNG Telekom we yu yusim liklik mani olsem 2 toea tasol long ringim narapela Citifon, na i toea long salim ol mesej i go long narapela Citifon.

# Ol Kristen meri kisim salens

SALENS i go aut long ol Kristen meri PNG long kamapim senis insait long kantri.

Distrik Superintenden bilong Nazarin Sios long Is Sepik na nesanel presiden bilong sios ya long PNG, Reveren Yambe Sike, i bin wokim dispela salens taim em i edresim moa long 1,500 meri husat i wok long stap insait long wanpela wik sios felosip bilong ol i wok long kamap long Mendi, Sauten Hailans long dispela wik.

Reveren Sike i tokim ol meri olsem ol i ejen bilon g senis na ol i ken kamapim ol senis long

ples wantaim ol preia bilong ol.

"Bikpela i laik bildim Sios bilong em na rot we em i laik mekim em long yupela, " Reveren Sike i bin tokim ol meri olsem.

Em bin tok God i laik bildim sios bilong em insait long kantri na long pait agensim na rausim korapsen. Na rot bilong bihainim, em long wokim ol stretpela pasin na mekim kantri i lusim korap pasin em long stap stretpela oltaim na larim kantri i fri long sinpasin.

" Mi tokaut olsem dispela konvensen o bung i mas kamapim wanpela

santu muvmen ol i kolim long "holines muvmen" we ol meri i statim pinis," Pasto Sike i tok.

Reveren Sike i tok Angelo Gabriel i bin tokim Maria olsem em bai karim wanpela pikinini man na em bai givim nem Jisas long em. Na em bai kamap king.

Reveren Sike i tokim ol meri long noken laikim na bisi tumas long ol samting bilong graun, tasol ol i mas wokim stretpela pasin bikos olgeta samting yumi gat long dispela graun bai pinis. Tasol holiness muvmen bai no inap pinis.

Ol Nazalin meri long

olgeta hap bilong kantri i bin kamap long dispela kibung. Sampela i bin kam olgeta tu long Irian Jaya long stap long dispela bung bai pinis long tumora, Septemba 30.

Narapela meri lida, Gertrude Andreas, em sekreteri bilong Nazarin Ministri bilong ol meri, i bin tokim ol meri olsem ol i ol strongpela ston bilong famili bilong ol bikos ol i save mekim planti wok long lukautim man na ol famili bilong ol. Tu, ol i save pre planti na ol i save kamapim pis o gutpela insait long ol famili na komyuniti bilong ol.



**OL NAZARIN MERI:** Ol Nazarin Sios meri lung bilong ol. *Poto: John Samar*

**OXFORD, TOK PISIN INGLIS DIKSENERI**

Katim, na pulimapim oda fom daunbilu na salim i kam long Wantok Niaspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long Ingles, o Ingles i go long Tok Pisin. Harap na kisim wanpela bilong ol dispela gutpela buk we inap strongim Tok Pisin bilong yu.

**ORDER FORM**

ITEM	QTY	PRICE	TOTAL
PNL Tok Pisin English Dictionary	1	9780195551129	438.00

Subtotal: 438.00  
GST: 0.00  
TOTAL: 438.00

Approved for Payment: [Signature]

Address for Payment: [Address]

**FAX BACK TO: (675) 325 2579**

# PNG i sot long ol save wokman long saiens, teknoloji na teknikel eria ...NSoE bai helpim daunim

## Somare tok lukaut

Veronica Hatutasi i raitim

**PNG i sot long 20,000 mak long ol save woklain long ol teknikel, sains na teknoloji eria long wok insait long Likwifaid Naturel Ges (LNG) na ol wel (oil), ges na maining projek long dispela kantri, na em i mas mekim samting hariap long daunim dispela hevi.**

Ekting Edukesen Sekreteri, Dokta Joseph Pagelio i tok olsem long opening bilong tripela de Nesenel Skul ov Ekseles (NSoE) semina aste long Hideaway Hotel long Mosbi.

Semina i pulim ol bikman bilong edukesen long nesanel na provinsel level, ol skul prinsipel long 6-pela Nesenel Hai skul, sekonderi, Dipatmen bilong Edukesen (DoE), ol developmen patna na ol bikpela sapota bilong DoE olsem AusAID, sios, ol NGO, ol risets lain na ol narapela lain moa i save sapotim na wok long eria bilong edukesen.

Dispela tripela de semina i laik glasim, skelim na kisim ol tingting bilong olgeta lain long NSE

na long pinis bilong semina, kamap wantaim polisi fremwok we DoE bai bihainim long mekim ol wok redi bilong kirapim dispela skul insait long kantri long yia 2015.

Long mekim kliia ol NSoE, ol 6-pela Nesenel Hai Skul long kantri olsem Sogeri, Keravat, Aiyura, Passam na Pot Mosbi Nesenel Hai skul wantaim sampela sekonderi skul long kantri we gavman bai makim bai kamap ol NSoE. Ol bai ino inap statim ol nupela skul long kamap ol NSoE.

Dokta Pagelio i tok gavman i bin kamap wantaim tingting bilong kamapim ol NSoE long wanpela bung long Wabag, Sauten Hailans provins long 2009 na em i bihainim Visen 2050 na em bai helpim PNG long kamapim ol yangpela pipel husat bai kamapim save na ol samting na i no long yusim ol save na ol skil o wok, olsem nau.

Em i tok bikpela eria we dispela NSoE i fokus long en em long kisim na skulim ol top sumatin long Gret 11 na 12 long

ol eria olsem saiens na teknoloji na mets.

"NSoE em i skul bai kisim top 5 pesen long ol sumatin i mekim gut stret long mekim Gret 11 na 12 na ol bai resis long kamapim ol kwaliti sumatin long husat i ken resis wantaim na stap long wankain level wantaim ol narapela kantri long wol.

"Gavman i luksave long sot bilong ol "skilled" o save woklain long PNG long sait bilong saiens na eria olsem kemistri, fisiks, jiloloji, ol maining na petrolium enjinia, teknoloji na mets na tu, long teknikel eria, taim Likwifaid Naturel Ges (LNG) projek i kam insait.

"LNG projek i laikim 30,000 woklain tasol PNG i ken givim 10,000 woklain. Na nau em i sot long 20,000 woklain. Na yumi no inap lusim olsem, tasol yumi mas mekim samting long kamapim dispela 20,000 i sot na daunim dispela hevi.

"Fokas bilong NSoE i long mets, saiens na teknoloji na ol sumatin bilong yumi bai yusim save long kamapim samting na i

no yusim save bilong ol narapela kantri tasol long kamapim samting.

"Yumi statim dispela long kamapim kwaliti edukesne long elementeri inap long sekonderi level," Dokta Pagelio i tok.

NSoE bai kisim fanding aninit long nomol edukesen baset na ol bai katim i go long em.

Baset bilong NDoE long neks yia em K610 milien na namba wan hap long K300 milien em i kisim long Saplimenter i baset we gavman i tokaut long em tasol long tupela wik i go pinis.

Bikpela wok redi pastaim long kirapim ol NSoE em long sanapim na stretim ol klasrum, wokim na stretim ol saiens le-boretori, ol haus slip bilong ol tisa na ol sumatin na bai i ken gat gutpela ples bilong lainim.

I gat komiti bilong NSoE we Ouka Lavaki bilong NDoE i go pas long en we i wok hat long dispela projek long mekim ol wok redi. Na dispela semina i wanpela long ol wok redi long kisim ol tingting na kamapim polisi fremwok long NSoE.

MEMBA bilong Angoram, na bipo minista i bosim Stet Enteprais, Arthur Somare, i givim strongpela lukaut bihainim toksave olsem gavman i orait long maritim Air Niugini na Airlines PNG balus kampani.

Mista Somare i tok strong olsem dispela bungim bilong tupela balus kampani i mas kisim tok orait bilong Independen Konsuma na Kompetisen Komisin (ICCC), pastaim long ol i kamapim dispela marit.

Em i tokaut tu olsem dispela em i no wanpela nupela tingting bilong nesanel gavman.

"Taim ministri bilong trenspot i bin kamapim dispela tingting las yia, em i tokim Somare gavman olsem dispela kain bung bai mekim moa mani, bikos em bai apim pe bilong ol balus tiket long domestik na intanesenel ron wantaim," Mista Somare i tok.

Em i tok ICCC i gat bikpela wok bilong lukautim sindaun bilong pablik long kain wok bisnis olsem, na gavman i mas sekim em pastaim long ol i go het na bungim tupela balus kampani.

Somare i tok em i wari moa long Air Niugini yet, bikos em i wari dispela marit bai lukim dai bilong namba wan bikpela balus kampani bilong kantri.

Sir Mekere, husat i bin tok kliia long kamap bilong tupela kampani aninit long wanpela bikpela kampani tasol, i tok dispela tingting i no bihainim tingting bilong mekim winmani. Nogat.

Em i tok gavman i lukluk long bringim moa sevis i go long ol liklik ples, we planti moa pipel i stap long en.

Mista Somare i tok tu olsem toksave bilong praim minista olsem nupela balus kampani bai ron i go long 130 ples balus em i wanpela 'tok giaman'.

"Sapos dispela nupela balus kampani i ken sevisim 50 o 60 domesik ples balus pastaim long Krismas, dispela bai lukim bikpela manim mak tru ol i mas i gat. Nogut bai ol i no inap stap laip yet long bihain," em i tok.

## APNG i wanbel tasol

BALUS kampani Airlines PNG, husat i wok strongim sindaun bilong em namel long ol liklik ples balus na ol rurel balus ron, i amamas tasol long tingting bilong gavman.

Long websait bilong en, kampani i tok em i amamas tasol long tingting bilong gavman long luksave long opim balus ron i go long ol rurel eria.

"Dispela marit bai bringim moa gutpela samting bilong pipel bilong PNG, we i gat plen i stap long pulim balus sevis i go long ol busples we i nogat balus i ron i go long en.

"Em bai lukim nupela kampani long bosim wanpela long ol namba wan bikpela balus namba long Saut Pasifik, na moa ron bilong inapim olgeta intanesenel na domestik ples, namel long kain ples olsem Singapore i go olgeta long ol liklik ples long PNG," kampani i tok.

Ol i tok nau ol i wetim tasol olgeta nesanel atoriti na gavman long sekim gut dispela wokbung tingting, na ol i redi long go het long sevim ol pipel bilong PNG.

## Pipia pulap long pablik ples

BOSMAN bilong Benk Saut Pasifik (BSP) Ian Clyne, wantaim ol liklik mangi klinim sait bilong bikpela rot long Boroko Tabari bisnis senta long Sarere wik i go pinis aninit long BSP Go Green kempen. Olgeta hap long kantri tu i mekim wankain samting long provins bilong ol. Dispela ol pipia, bosman bilong BSP na ol mangi i klinim em ol dok save pulim long ol haus stap klostu long Boroko Tabari ples.



Poto na stori: Nicky Bernard

**TELI Apdeit**

**Sunset township of Vanimo says 'YELLO' with Citifon**  
**Citifon handsets commence sale in Vanimo town**

The yello bandwagon, Citifon has come to the shores of Vanimo town in the Sandaun province with the locals to enjoy the affordable call and internet connectivity rates. Vanimo is the latest township where Telikom PNG's Citifon has commenced the sale of handsets offering the residences of Vanimo the most affordable call rate of 2 toea per minute for Citifon to Citifon and 39 toea per minute to call other networks all day and all night.


Teikom PNG Chief Executive Officer – Peter Loko said since the launch of Citifon in May initially for Port Moresby, Lae and Kokopo, customers demand for Citifon has been overwhelming.

"Citifon is now our flagship brand while the fixed wireless phone and internet service using the internet dongle are also available on this network at very affordable rates which we believe is truly affordable for ordinary Papua New Guineans. To mark this sales launch Telikom is offering K50 free Telikad for every purchase of a V3 Citifon at K50.00," Mr Loko remarked. He said the service aims at providing value-for money to Papua New Guineans with the essential value being that of keeping in touch with family, friends and colleagues.

"This service will be extended into other centres around the country with team Telikom keen on its vision to have every Papua New Guinean have access to a telecommunication service by 2020. This will not only be for voice service but we also want our schools in the rural areas to have access to the internet to boost their learning, public servant to be able to access their bank accounts, local businesses to expand through networking and so forth," Mr Loko said.

Telikom Head of Commercial – Xavier Victor said for the month of September to mark the country's Independence anniversary, Citifon recorded being the first network in the country to offer the lowest international call rate at an exciting 39 toea per minute call rate to selected countries including Australia, India, China, Malaysia and the Philippines. Some residences in PNG from these nationalities when calling home have acknowledged Citifon for this rewarding call rate with Telikom also noting a fair increase in the call traffic into these countries.

There are five ranges of handsets with the models being that of V3 Gem, V3 Xing, V26, V27 and Alcatel OT-1650C. These handsets come with funky features that included FM Radio, music and video player, camera, and data modem that can be used to surf the internet. In other words, the phone can simply be used as an internet modem. Handsets come in very affordable prices ranging from as low as K79 to K199.



# Midia i gat wok

**Bustin Anzu i raitim**

**MIDIA i gat bikpela wok long mekim long toksave long gutpela pasin bilong vot long 2012 Nesenel Ilekseen, wanpela woksop long Kokopo, Is Nu Briten Provins, i painim aut.**

Midia i gat wok long toksave long ol manmeri bilong Papua Niugini long ronim ilekseen, vot na kaunim vot long painim aut trupela na gutpela lida.

Neville Togarewa bilong wanpela niuspepa long Hagen, i tok midia em i wanpela strongpela samting we ol i ken yusim long toksave long ol manmeri long painim aut gutpela lida.

"Ol niuslain i gat bikpela wok long mekim long ilekseen bilong 2012. Media i wanpela rot we ol manmeri long ples i ken kisim helpim na luksave long pasin o rot bilong vot," em i mekim dispela toktok long dispela wik long wanpela 1-wik kos we Papua Niugini Ilektral Komisen i holim bilong ol niusman long Momase, Hailans na Niugini Ailans, we Atanomos Rijen bilong Bougainville

tu i stap insait long en.

Dispela bung long Kokopo em long kisim tingting bilong ol niusmanmeri long olsem wanem Papua Niugini Ilektral Komisen i ken yusim sevis bilong midia long kisim ol stori bilong Ilekseen i go long ol manmeri long ples.

Dispela bung tu i laik painim aut wanem kain sevis we media i ken kamapim na tu, ol i ken sapotim wok bilong Papua Niugini Ilektral Komisen olsem wanem na wanem rot em i gutpela long helpim ol.

Dispela bosman bilong Pos Koria niuspepa long Hailans i tok ol pipel insait long bus, maunten na solwara i no inap save long pasin bilong vot long wanem, dispela nupela LPV rot bilong vot i narapela kain olgeta long pasin bilong vot long ol olupela ilekseen na ol i gat bikpela wok long mekim long toksave long nupela na isipela rot bilong vot.

Long wankain taim, faseteta Alwyn Jimmy i tok media i mas givim gutpela stori long ol pipel long wok bilong ilekseen.

Em i tok planti ol ripot i mas stret



Sampela ol rijenal jenelis bilong Hailans, Momase na Ailan rigin husat i sindaun long dispela Midia na Ilekseen woksop long Kokopo.

na trupela long wanem, planti ol manmeri i save kisim ol stori long midia na ol i save bilip. Olsem na wanem kain stori ol i givim long nius, em i mas trupela na stretpela.

Ol nius lain i bin givim sampela tingting tu long ol niuslain long olsem

wanem ol i ken wokbung wantaim Papua Niugini Ilektral Komisen long kamapim dispela ilekseen i fri, seif na gutpela long olgeta vota long taim bilong ilekseen.

Dispela bung bai pinis long tumora (Fraide).



Tim poto – Ol niusmanmeri bilong Hailans, Momase na Niugini Ailans i bung long Kokopo long strongim save bilong ol long wok ilekseen, redi long 2012. Ol Poto: Bustin Anzu

## Pasin wanbel na wokbung mas stap long ilekseen 2012

**Sape Metta i raitim**

PASIN bilong wanbel na wokbung namel long midia na PNG Ilektral Komisen i mas strong long lukim 2012 nesenel jeneral ilekseen i kamap gut.

Moa long tripela ten (30) niusmanmeri husat makim ol bikpela midia ogenaissen olsem Post Courier, National na Wantok Niuspepa, Kundu 2 tv na ol lokel brodkas opisa long ol praivet radio stesin long Hailans, Momase na Ailanrijen i kamap na kisim trening nau long wanpela woksop bilong strongim wokbung namel long komisen na midia.

Meri husat i go pas olsem fesiliteta long dispela woksop Regina Lunge, i tok as tingting bilong kamapim dispela woksop em long skulim na trenim ol niusmanmeri husat bai i ken surikim dispela save long skulim ol arapela long pasin bilong tromoi gutpela vot long gutpela na stretpela pasin.

"Ol manmeri i nidim edukesen, na dispela em yupela ol niusmanmeri bai iken mekim kamap long taim yupela iwokim ol gutpela ripot we ol bai iken lukim, harim, ritim na bihainim", Lunge i tok.

Em itok long ol yia igo pinis ino bin igat luksave long dispela pasin wok

bung olsem na planti manmeri i no kisim gut luksave na tromoi ol vot nating nating long ol kendidet.

"Dispela pasin wanbel na wokbung em Ilektral Komisen i kamapim wantaim ol midia lain em i bikpela samting long wanem mipela i kisim luksave pinis olsem wok bilong ilekseen em bai ken go stret sapos ol manmeri i kisim toksave gut na tu luksave long ol midia pablisiti bipo long ol i ken go long putim mak na tromoi ol vot bilong ol, long wanem, dispela mak na vot bilong ol i mas karim gutpela kaikai so ol dis-

pela lida bai iken kisim ol sevis igo long ol", Lunge itok.

Ripota Paul Fuzo husat i kam long Wewak - Is Sepik provins long stap long dispela woksop em i amamas long kamap na kisim trening, long wanem, dispela skul em kisim long dispela trening woksop bai helpim em long taim nesenel jenerel ilekseen ikamap long 2012.

"Dispela trening mipela i kisim em i opim ai bilong mipela ol niusmanmeri na tu em i helpim mipela long karim aut wok bilong mipela long taim bilong ilekseen", Fuzo i tok.

# Wok em i rait bilong yumi olgeta

“Mipela stap nating nabaut long strit. Mipela kam long Hagen long painim wan kina tu kina nabaut. Salim buai smuk, kisim toea na baim kaikai. Stap olsem. Nogat wok. Nogat we bilong raun long narapela hap na mipela i stap.”

Namba wan gol long Mama Loa bilong PNG i tok olsem, i no gat wanpela man o samt-

ing i ken daunim o pasim rot bilong ol man o meri, bai em i no inap divelopim olgeta save na strong bilong em, na kamap man o meri tru long ai bilong ol arapela manmeri.

Planti yangpela i pinisim skul na ol i stap nating. Rong bilong husat? Moabeta yumi askim “rait” bilong husat?

Olsem Mama Loa i tok, yumi gat rait long

divelopim olgeta save na strong bilong yumi. Yumi gat rait long holim wok. Ol man o meri i gat wok ol i inap pilim amamas long sapatim komyuniti na famili bilong ol. Ol mangi long Hagen i tok, “Mipela i stap nating. Bai yumi lukim - gavman bai helpim yumi long holim wok o nogat?”

**Poto na stori: Pater Philip Gibbs SVD**



WOK WE: Ol mangi i pilim kol na hatim skin long moning taim tru long Hagen taun. Ol bilong Sauten Hailans - Ialibu, Mendi.

## Simbu redi long karim ‘Lukautim Pikinini’ program

**Eric Sinebare i raitim**

GUTPELA rot na pasin bilong luksave long lukautim olgeta pikinini bilong yumi, we i ken gat rispek, na kamapim wok we olgeta manmeri mas save olsem, loa i stap long banisim na soim yumi long wanem rot we yumi ken luksave olsem, ol

pikinini tu i gat rait long olgeta kain rot long lukautim.

Dispela em i astingting long wanpela wok trening i kamap long Simbu, long Lukautim Pikinini loa.

Meri i go pas long trening, na welfe opisa bilong Simbu Komyuniti Divelopmen divisen, Cathrina Aiwa i go pas long en.

Em i tok dispela lukautim pikinini loa i gat nainpela hap o program bilong ronim, na dispela em i namba wan hap we dispela trening i luksave na trenim ol gavman opisa.

“Dispela lain em mipela i kolim ol ol fran laina, em ol distrik komyuniti divelopmen opisa olsem polis, haus kot o jastis, helt na edukesen,

o skul i stap insait long dispela trening,” em i tok.

Twenti faiv manmeri i stap insait long trening i stat long las wik Mande, na i pinis long Fraide.

Misis Aiwa i tok trening em bilong skulim ol opisa long lukluk long lukautim ol pikinini long abrusim na

halivim ol long pasin birua, paitim ol, lukautim ol long kaikai, ples nogut, i no ken bungim birua, ples bilong ol pilai na tu long ol i noken bungim hevi, wantaim ol luksave na lukautim ol na strong ol kamap bikipela na i gat strongpela tingting na groa long gutpela pasin na save.



LUKAUTIM PIKININI: Komyuniti Divelopmen opisa bilong Simbu, polis, helt, edukesen lain i kisim skul bilong lukautim pikinini Ekt o loa, we komyuniti divelopmen opis i kamapim long Kundiawa.

## Sandaun provins tok ‘Yello’ wantaim Citifon

OL PIPEL long Vanimo, long Sandaun Provins, nau bai tok ‘Yello’ wantaim Citifon bilong ol.

Telikom PNG long dispela wik i go lonsim Citifon mobail fon sevis bilong ol long Vanimo taun.

Long lonsim Citifon, CEO bilong Telikom PNG, Peter Loko, i tok dispela telefon bai helpim tru ol pipel long ples, bikos prais bilong ring em tamblo tru na tu, em i

ken helpim ol skul pikinini long go long intanet long lainim sampela samtung.

Em i tok tu olsem ol wok manmeri tu bai isi long mekim benking bilong ol long dispela Citifon.

Citifon nau i stat long go insait long ol liklik provins insait long kantri.

Long taim em i kam nupela, em i stap tasol long ol bikipela taun olsem Pot Mosbi, Lae na Kokopo

tasol. Prais bilong wanpela Citifon handset em tamblo, na yu ken kisim K79 na go antap long K199 tasol.

Ol dispela fon i gat radio, musik pilaia na sampela i ken go stret long intanet.

I gat 5-pela kain Citifon Telikom PNG salim, stat long V3 Gem, V3 Xing, V26, V27 na Alctel OT-1650C, ol dispela fon em bren bilong Telikom PNG.

Citifon nau i wok long karim nem bilong Telikom PNG insait long kantri, tasol i gat ol narapela telefon tu i stap olsem waia les fon we yu tu ken go insait long intanet sapos yu yusim.

Mista Loko i tok, “Telikom wok long wok hat long traim kisim sevis go insait long ol pipel insait long rural eria, em makim long yia 2020 olgeta Papua Niugini bai yusim telekominikesen”.

Ripot i tok PNG  
Helt wok fos i gat  
bikpela hevi

WANPELA nupela ripot i kam long Wol Benk i tok wokfos bilong PNG helt i bungim wanpela bikpela kraisis o taim nogut.

Em i tok hap bilong olgeta wokmanmeri bai 'ritaia' o lusim wok i go long ol narapela wok insait long tenpela yia.

Wol Benk konsalten, Ian Morris i askim strong ol bikpela gavman ejensi long wok wantaim long stretim dispela bikpela hevi, wantaim tu, long trening.

Krismas bilong planti long ol helt woka long PNG long dispela taim i stap long 55 o moa.

**NSoE bai kamapim bek kwaliti edukesen na yuniti**

Veronica Hatutasi i raitim

NESENEL Skul ov Ekselens (NSoE) progrem bai kamapim gutpela stendet long kwaliti bilong edukesen na long wankain taim tu, bringim bekol gutpela pasin, resis na nesanel yuniti we ol nupela edukesen rifom o senis i kamapim, Edukesen Minista, Theodore Zurenuoc, i tok.

Em i tok NSoE i no nupela samting bikos em bin stap long pastaim long Nesanel Hai Skul sistem we kwaliti na stendet long ol lain i mekim gut na kisim gutpela mak i go long yunivesiti i save stap.

Em i tok sanapim ol stendet i mekim ol sumatin i wok hat, gat ol gutpela positive pasin long stadi, resis, skul na stap olsem ol pipel i yunait na sanap olsem wanpela pipel bilong dispela kantri.

Em i tok ol edukesen na kurikulum rifom o senis i bin stat long yia 1995 i mekim ol skul na ol sumatin i bruk na lusim nesanel yuniti na ol kain hevi olsem wanpisin na rijinel pait i save kamap long ol bikpela skul bilong yumi.

"Rijinelisim, wanpisin pasin na pasin long strongim provinsal grup i no bin stap long ol nesanel hai skul na ol yunivesiti long ol yia pastaim.

"Yumi bin lusim resis long akademik sait, wok hat na mekim gut na kisim gutpela mak, wok hat long kisim gutpela mak long go long yunivesiti, praut olsem yumi wanpela pipel bilong PNG, taim nupela rifom na senis long edukesen na kurikulum i kamap.

"Yumi bin lusim nesanel yuniti na laikim kantri taim sekonderi edukesen sistem i kam insait.

"Dispela sistem i bin promotim wanpisin pasin, pasin bilong bung na luksave olsem yumi bilong wanpela provins na rijin na kibek bilong en em ol wan pisin pait na rijinel grup long ol bikpela skul bilong yumi," Mista Zurenuoc i tok.

Em i tok aninit long nupela edukesen rifom sistem, gavman na Edukesen Dipatmen i bin givim bikpela tingting long tanim ol hai skul i go long sekonderi skul na em i lus tingting long kwaliti na stendet long edukesen sistem.

Em i tok ol bin lusim tingting long ol nesanel hai skul long lukautim ol yet na olsem, ol klasrum, ol skul bilding, ol haus tisa na haus slip bilong ol sumatin na ol narapela skul bilding i bin bagarap.

# Humen risos na gutpela pasin i bikpela samting

Veronica Hatutasi i raitim

**DIVELOPIM humen risos na gat pipel i gat gutpela skul na save i bikpela samting long kisim kantri i go fowet, Minista bilong Edukesen, Theodore Zurenuoc, i tok long opim bilong tripela de semina o kibung bilong Nesanel Skul bilong Ekselens (NSoE) i bin stat aste long Hideaway Hotel long Mosbi.**

Long wankain taim tu, Mista Zurenuoc i tok kamapim ol saveman

long kantri i mas go wankain ol yangpela i lainim na i gat gutpela na stretpela pasin bikos dispela i ken daunim korapsen we ol lain i gat bikpela save na wok long ol bikpela opis i mekim.

"Gavman bilong nau i givim bikpela sapot long edukesen bikos edukesen em i ki we i opim rot long kantri i gat planti samting na i go het gut. Tasol givim gutpela sapot na trening long pipel bilong yumi i bikpela samting moa long ges, wel, gol na mani i bikos developmen bilong kantri bai kamap

sapos yumi gat gutpela humen risos.

"Long wankain taim, mi no bilip tasol long bildim save na ol bikpela wok kamap ol pipel bilong yumi i ken mekim, nogat.

"Mi mas tok klia olsem sapos save i kilim man, tasol pasin bilong em i no stretpela o gutpela, bai em i kamapim moa bagarap long kantri bilong yumi na i no gutpela divelopmen.

"Yumi mas bildim edukesen sistem we i bungim wantaim divelopmen bilong bikpela save na senisim pasin long

kamap ol gutpela manmeri. Dispela bai kamapim gutpela samting na gutpela sindaun long PNG.

"Ol lain i kisim bikpela skul na save i wokim ol korap pasin na edukesen sistem bilong yumi bai kisim skul bilong gutpela pasin o skul bilong morals ethics olsem hap bilong kurikulum bilong edukesen long elementeri i go long sekonderi level insait long kantri," Mista Zurenuoc i tok.

Mista Zurenuoc i mekim klia olsem NSoE em i skul bilong "future" o bihain taim bai kamap long ol nesanel hai skul

na ol sekonderi skul ol makim ol long stap long dispela kain skul.

Em i tok dispela skul bai gat edukesen stendet na ol klasrum, ol saiens leboretori na ol haus tisa na ol arapela skul bilding olsem tasol dispela long intanesenel level.

"As tingting em long kamapim ol smatpela sumatin bai gat bikpela save na wok long saiens na teknoloji eria. NSoE bai skulim na redim ol sumatin long tingting na askim, bihainim,

kamapim na mekim samting pastaim ol i go long ol bikpela skul, Mista Zurenuoc i tok.

## Marit trening i ken daunim HIV na ol sik STI

WANPELA semina i bin kamap long Nesanel Risets Institut (NRI) long Mosbi i harim olsem PNG i ken daunim HIV na AIDS na tu, ol sik olsem gonoria, sifilis o Seksueli Transmisi Disis (STI) sapos ol marit lain wantaim i go insait long trening we wok risets yet i kamapim.

Deputi Progrem dairekta bilong Populesen Sevis Intanesenel (PSI), Leah Hoffman, i tok Maritel Rilesensip Trening (MRT) em i hap bilong Tokaut na Tokstret progrem ol i karimaut long helpim ol manmeri i senisim pasin long ol ruel eria we ol divelopmen projek i kamap long en.

Dispela trening i givim nupela save we ol marit lain ken yusim long gat gutpela na helti laip insait long marit bilong ol, daunim pasin bilong paitim na bagarapim meri, daunim paul pasin we ol marit man na meri i save gat ol narapela patna o poromanna larim senis i kam insait i ken daunim sans long tupela marit i kisim na givim binatang long sik HIV na AIDS na ol STI long ol yet.

I no longpela taim i go pinis, wanpela wok painimaut i bin kamap long tripela eria we i soim olsem taim ol man na meri bilong ol wantaim i sindaun long MRT woksop, ol i kisim gut ol skul na lol toktok we i helpim ol long toktok na stretim ol samting, na dispela i helpim ol gut marit laip na famili bilong ol.

Wok painim i soim olsem taim ol man i sindaun long trening, em i helpim ol long kisim na skruim save long eria bilong

karim binatang bilong HIV na givim long narapela.

Long sait bilong ol meri, trening i bin givim ol moa save long kontrolim rot long stopim binatang bilong HIV na AIDS i kalap long narapela.

Semina i harim tu olsem trening i daunim pasin we ol man i save raun na slip wantaim planti patna, paitim ol meri na moa marit lain i wok long yusim kodom o karamap.

Mis Hoffman i tok ol wok painim i soim tu olsem komyunikesen na negosiesen long marit laip na edresim olsem marit laip i go gut i ken kamapim gutpela samting insait long famili na moa yet, long ol pikinini.

Mis Hoffman i tok MRT i gutpela pekej we i edresim ol as long ol samting i kamap olsem ol marit man na meri i painim poroman ausait long marit, paitim meri na bruk long marit na famili laip.

Dispela liklik trening progrem i wok long kamapim gutpela samting long ol ki eria na i gat askim pinis long kisim dispela MRT trening i go long ol yangpela nupela marit na dispela i ken stopim ol long givim HIV binatang i go long narapela na tu, paitim meri.

Wok glasim na monitaim long dispela progrem i givim sampela kliapela save olsem trening ya i wok lon g helpim ol marit i stap gut we i wanpela samting Tokaut na Tokstret Projek bilong Populesen Sevis Intanesenel i laik lukim i kamap.



TWISTED FORTUNE: Ol Tiata Ats sumatin bilong Yunivesiti bilong PNG i putim kamap pilai ol i kolim Twisted Fortune em i stori bilong wanpela pikinini meri ol tewel bilong wanpela ailan long Madang provins, i holim em i stap bihain em bin go aut long painim ol bus marasin long givim long brata billong em husat i sik. Ol tewel i laikim ol yangpela pikinini meri husat i lukim namba wan sik mun na ol i kisim ol na holim ol long ailan. Tasol olsem long piksa, pikinini man bilong sif we olgeta long ples i save olsem em i lesman, i bin kilim het tewel na kisim bek dispela yangpela meri.

Yunivesiti bilong PNG i wok long soim dispela pilai stat yet long dispela wik Mande inap long tumora Fraide, stat long 7.30 nait na pinis long 9.00 kilok nait. Ol bikpela man i peim K7 lon g lukim tai mol pikinini na sumatin i peim K3.00. Tasol long Gala nait long Sarere, Oktoba 01, ol bai sasim ol bikpela man K50 long lukim so na K25 long ol pikinini.

Poto na stori: Kairu Laho bilong UPNG Pablik Rilesens na Maketing



**Yut, Meri na Famili wantaim Lorraine Siraba**

### Plenim ol famili

LONG las wik, mi bin toktok long populesen bilong wol i sanap long 7 bilien mak nau na as tingting long ol famili long PNG i mas plenim ol famili bilong ol.

Mining olsem hamas pikinini ol i plen long karim i mas inap long mani mak ol i gat na inap long lukautim ol, na wanem taim ol bai karim ol pikinini.

As tingting long sapotim ol marit long gat ol liklik famili i no bilong kontrolim populesen bilong kantri we i wok long groa bikipela hariap tumas, tasol bikos tude long PNG, em i hat tru long lukautim bikipela famili.

Mi laik toktok liklik long ol hevi bilong gat bikipela famili long PNG wtaim mi serim dispela stori bilong wanpela yangpela man husat i wok wantaim wanpela lokol NGO long rihabilitesen progrem bilong ol. Bai mi kolim dispela yangpela man Russel.

Em i wanpela strongpela sapota bilong famili plening bikos em i lukim pinis hatpela laip insait long bikipela famili.

Russel i tok famili bilong em i gat 6-pela pikinini. Na i no bin gat inap mani long salim em na ol narapela brata susa bilong em i go long skul. Taim em bin drop aut long skul, em olsem stap insait long bikipela famili i hat long lukautim na inapim olgeta long kaikai, klos na ol narapela samting moa. Taim em i lusim skul, papamama bilong em i no bin gat inap taim na mani long helpim em i painim sans long skruim skul bilong em o wok. Dispela em bikos ol bin gat narapela pikinini long tingim. Em i tok oltaim, i no save gat inap kaikai long olgeta lain na olsem, wanem kaikai ol i gat em ol liklik i mas kisim pastaim taim ol bikipela baim ol i nogat na ol i save hangere i stap. Mekim na Russel i bin go painim ol poroman na raun long strit long painim kaikai samting long lukautim em yet. i no bin gat laik pasin long famili long wanem, papamama bilong em i bisi mekim ol narapela samting. Na i nogat inap taim long sindaun na gat taim wantaim ol pikinini bilong ol.

Russel i tok wanpela samting wantaim ol bikipela famili em, taim i no gat inap mani, ol bai wokim disisen husat bai go long skul na husat bai kaikai. Taim i gat hevi long famili olsem papamama i kros pait, wanpela long ol i lusim haus. Na em i wokim disisen husat i stap bek na husat bai go wantaim em. Husat i givim ol papamama rait long pila i wantaim laip bilong mipela?" Russel i askim.

Stia tok bilong Russel i go long ol yangpela pipel tude em, long tingting gut tru pastaim yu gat pikinini. "Mi bin kamap wanpela strit pikinini na mekim ol kriminel pasin na laip na sindaun mi bin stap long en i no gutpela. Mi no bin pinisim skul bilong mi na mi nogat inap save i ken helpim mi long kisim wanpela wok long wanem, papamama bilong mi i no bin gat plen long mi na ol brata susa bilong mi. Mipela i planti tumas na nogat lain long lukautim mipela. Insait long ol dispela samting, ol pikinini i kisim hevi na ol i mas lukautim ol yet, tasol mipela i no askim long kam long dispela wol," Russel i tok.

Taim wol 7 bilien kempen we i wok long kari-maut awenes long wol populesen i wok long go bikipela hariap, larim stori bilong Russel i mekim yumi skelim tingting sapos yumi inap long lukautim pikinini pastaim yumi karim ol. I gat planti pikinini tumas i raun nating long rot tude bikos sampela lain i karim ol long wol na i lusim tingting long ol.

### Raun lukim ol meri na pikinini...



OL PLES PIKININI: Ol dispela pikinini, (fran) Ebony, Natalia na Durrel wantaim (baksait) Bianca, Joey na Haima, bilong ples Monoitu long Siwai. Otonomes Rijen bilong Bogenvil, i wok long amamas pilai i stap long ples bilong ol wanpela moning taim Meri Wantok i singautim ol long kisim potona ol i ron i kam. *Poto: Veronica Hatutasi*



## PNG SUSTAINABLE DEVELOPMENT PROGRAM LTD



### Narapela gutpela helpim gen bilong PNGSDP i go long Human Risos Developmen long PNG

Ol Yangpela meri long PNG nau bai i gat sans long go het na pinisim ol stadi bilong ol bihain long gutpela sapot i kam long Bisnis na Profesional Women's (BPW) Klub bilong Mosbi.

Mipela i bilip olsem wanpela rot long strongim developmen na mekim em i go orait long bihain taim em long strongim wok bilong ol meri insait long ol komyuniti bilong yumi. Olsem na, stat long 2009, PNGSDP i amamas long givim K50, 000 long wan wan yia insait long 5-pela yia long sapotim BPW Skolasip Progrem.

Dispela progrem i karamapim wok bilong givim hap skolasip bilong ol mama na yangpela meri long stadi inap gret 10 long sekendari skul, koles na ol vokesinal skul insait long kantri. Ol dispela lain ol i helpim em ol lain we i save hat long painim mani long peim skul fi bilong ol long wan wan yia.

Bel bilong mi kirap stret long harim ol stori bilong ol yangpela meri husat i kisim sans long wanpela skolasip na i luksave long wok ol i gat long stadi bilong ol, luksave long hatwok bilong papa mama na tu ol lain i givim skolasip na ol yet i wok hat tru long mekim gut long skul wok bilong ol. Wanpela long ol dispela yangpela meri em mi harim olsem em i greduet wantaim wanpela digri long Sivil Enjiniaring, maski olsem dispela kain wok em planti ol man i save wok long en. Narapela meri i greduet pinis na tude em wanpela medikol dokta. i gat planti moa stori i stap, we mi bai stori long bihain.

Long wan wan yia skolasip i save go antap moa long 50%. Long 2010, 133 skolasip i bin go long ol yangpela meri husat i stap long 34 institusen long Morobe, Madang, Wewak, Isten Hailans, Westen Hailans, Is na Wes Nu Briten, Sentral na NCD. Long dispela yia, mipela i lukluk long bringim namba i go antap long 300 skolasip. Dispela ekksesais i soim olsem maski olsem em liklik helpim tasol em i ken bringim kamap gutpela samting long bihain. Mipela olgeta i ken mekim gutpela wok taim mipela i stop na givim helpim i go long ol meri long kisim gutpela edukesen na lukluk long wanem ol gutpela wok em bai bringim i kam insait long femili na komyuniti bilong em.

Wantaim gutpela wok bilong lukautim gut o menesim ol dividen o man i kam long Ok Tedi long nau na bihain taim bilong Westen Provins na Papua Niugini, kampani i go het long givim gutpela tingting long ol Kristen ogenaisesen na NGO olsem BPW long wok gut na strong long developim ol human risoses bilong kantri long gutpela bihain taim bilong ol pikinini na tumbuna bilong yumi. Long wanpela ripot gen long bihain mipela bai lukluk long wanpela gutpela projek e mol meri long Westen provins i kamapim aninit long PNGSDP skolasip long stadi ovasis.

*I kam long Ofis bilong CEO (Article # 12 bilong 2011)*



CEO: David Sode

# Laikim wok teknisen ...Ol meri ken wokim



DIGIM: Carol Sione i digim hul long putim nupela kebol lain taim wanwok, Talmits Kabilu, i helpim em long hapsait i stap. Poto: Andrew Molen.

## Veronica Hatutasi i raitim

LONG PNG tude, ol meri i mekim ol wok we pastaim ol man tasol i save mekim.

Wanpela long ol em teknikel na enjiniaring eria na planti ol arapela eria moa.

Meri Wantok i bin bungim tupela yangpela meri long las wik Fraide i digim ol kebol na waia ausait long opis bilong em long Kanage Strit, 6 Mail.

Carol Sione na Talmits Kabilu tupela i bilong Otonomes Rijen bilong Bogenvil i wok olsem ol teknisen long Ekses Netwok bilong Telikom PNG long Mosbi.

Tupela i wok long digim graun long instolim o putim ol nupela kebol lain bilong telepon i go long nupela opis bilong ol Bisop Bratas (Bishop Brothers) kampani klostu taim ol bai opim long 6 Mail.

Tupela yangpela i bin stat wok wantaim Telikom long las yia Ogas bihain ol i pinisim skul long PNG Telikom Kolis, Lae long Morobe provins.

Insait long las 6-pela mun inap long dispela yia Februari, tupela yangpela meri i bin mekim prektikel wok na inap long mun Disemba, ol i wok olsem ol kesuel.

"Mitupela i amamas long kain wok mipela i mekim long en. Mipela i wok long Rihabilitesen Tim wantaim Ekses Netwok bilong Sauten Rijen.

"Ol eria we mipela i mekim ol wok long en em, instalesen o putim ol kebol long nupela eria, fols (faults) o lain i bagarap na kebol jointing (cable jointing)

# Sapotim ol Pasto na wok wantaim ol meri

## Veronica Hatutasi i raitim

**OL MERI** bilong ol Luteran pasto i save mekim bikpela wok long helpim ol man bilong ol na tu, long go pas na helpim ol meri insait long ol peris na kongriksen we ol man bilong ol i wok long en.

**Freida Max** i meri bilong Pasto Joshua Max husat i Distrik presiden bilong Siassi Luteran Distrik long Madang provins.

Meri Wantok i bin bungim Freida long dispela wik Tunde insait long Nesenel Luteran Pastos konprens i wok long ron long wanpela wik long Se John Guise Stadium long Mosbi.

Moa long 3,000 pasto na meri bilong ol i kam long dispela bung long olgeta hap bilong kantri long toktok long ol samting i karamapim wok bilong ol pasto, rot we Luteran Sios i ron long en, famili na yut, konstitusen o mama lo bilong sios na ol narapela samting moa.

Nau konprens em Evanjelikal Luteran Sios (ELC-PNG) Papua Distrik i lukautim.

Freidan a pasto man bilong em, Pasto Joshua, i wok namel long ol Luteran komyu-

niti long Siassi Ailan long 18-pela krismas nau, bihain long Pasto Max i pinisim skul pasto long seminari long Morobe provins long 1993.

Bihain long ol i wok 5-pela krismas long ol wan wan Luteran peris long Siassi Ailan olsem Samani, Aromani na long Lablab, Pasto Max i kamap olsem Siassi Luteran Distrik presiden na Freida wantaim famili i stap na sapotim papa bilong ol long wok. Na long wankain taim tu, Freida i wok wantaim ol meri long kamapim gut spiritual na fisikel sait bilong ol, maski ol kain hevi i save kamap long ol longwe ples olsem dispela ol i stap na wok long en.

"Laip insait long ministri i gat ol salens, tasol wantaim lukaut na stia bilong Bikman, mipela i save stap gut.

"Taim mipela i bin stap long bus na maunten ples, em i hat tru. Mipela i save wokabout longwe na slip long rot na bihain, go kamap long ples we mipela i laik go long en.

"Ol meri bilong ol pasto i save helpim na wok wantaim ol meri na stap olsem ol edvaisa. Mi save amamas long karimaut wok bilong Bikpela bikos mipela i save kisim planti blesing tu.

"Long wok bilong mipela ol meri, mipela i save helpim ol sik manmeri. Mipela i save go lukim ol na givim ol kaikai, liklik mani na tu, pre wantaim ol, wokim HIVna AIDS awenes na sapotim tu ol sios na gavman lida long ol preia bilong mipela," Freida i tok.

Bikos ol pasto i save kisim liklik alauwens tasol wanpela taimn insait long wanpela mun, Meri Wantok i bin askim Freida wanem rot ol i save bihainim long peim skul fi na ol narapela samting long helpim sindaun bilong famili.

Freida na Pasto Joshua tupela i bilong Siassi Ailan na ol i gat tripela pikinini.

"Mipela i save wokim maket. Mipela i gat gaden we i save helpim mipela long sait bilong kaikai na sapos i gat moa kaikai, mipela i salim.

"Long liklik maket, mipela i salim ol gaden kaikai, drai kokonas long helpim kisim skul fi mani," Freida i tok.

Konpren bai pinis tumora we bai lukim mini kalsere so long soim amamas na pinisim olgeta samting.

Strongim na lukautim kalsa bilong yumi em wanpela samting we ol pasto i wok hat long mekim taim ol i karimaut wok bilong ol.



PALAMEN WOKABAUT: Ol meri bilong ol pasto i wokabaut wantaim ol pasto man bilong ol i wokabaut go Palamen Haus long las Sande long pre long ol lida bilong kantri. Poto: James Kila



# Papua Distrik lukautim ELC/PNG Pasto bung



**“Lida oltaim mas stap stret long ai bilong God”**

YUMI ken lukim na lainim tu sampela gutpela lesen o prinsipol tu long laip bilong sampela lida man long Baibel.

Wanpela gutpela lida we yumi ken luksave klia long laip na pasin bilong em, em i David (King David). David oltaim i laik stap stret long ai bilong God na mekim pasin we God i laikim. Wanpela taim David i malolo na sindaun antap long ruf bilong haus pales bilong em na em lukim wanpela naispela meri i waswas long swimming pul long haus bilong em. Meri bilong Yuraie, nem bilong em, Bethsheba;.

Em i lukluk i stap na bel i kirap na em i mangalim tru dispela meri long laik tasim em na slip wantaim em. Orait em i yusim pawa o namba bilong em na salim ol lain i go kisim meri ya na kam long em na em i slip wantaim em.

David em i asua pinis long wanem meri em i marit meri. Man bilong em Yuraie, em i wanpela strongpela soldia bilong ami bilong Israel. David i trabel pinis long dispela meri orait em i wok hat tru long painim we bilong karamapim dispela rong we i mekim. Em i lukim olsem em i asua pinis long wanem, meri (Bethsheba) salim tok i go long David olsem em i bel pinis. Wantu tasol David i salim tok long Komanda bilong Ami long salim Yuraie i kam bek long haus; Yuraie i go kamap long David, na David tokim em olsem; “Yu ken go malolo, kisim kaikai na dring na stap wantaim meri bilong yu long haus”.

Taim Yuraie i go long haus em i tingting olsem, i no gutpela bai ol arapela soldia ol i pait long kantri na lusim meri, pikinini na gutpela sindaun na wok hat long pait na bai mi yet kam long haus na mekim olsem! Maski mi no inap mekim olsem King i tok, na em i slip long veranda inap King David i painim aut na salim em i go long pait. Em i salim tok hait long Komanda bilong Ami long putim em long hatpela ples stret bilong pait na ol birua i kilim em indai. ( Neks wik bai yumi harim namba tu hap bilong em.)

**Veronica Hatutasi i raitim**

**WANPELA wik bung bilong ol Luteran Sios pasto long kantri i wok long kamap long dispela wik long Mosbi, Nesenel Kapitel Distrik.**

Namba 9 Evanjelikel Luteran Sios (ELC/PNG) Konprens bilong ol pasto i pulim moa long 3,000 ol ELC/PNG pasto na ol meri bilong ol i kam sindaun long namba wan taim long Mosbi. Ol pasto na ol meri bilong ol i kam long ol ruel eria na taun bilong 4-pela rijen bilong dispela kantri.

Het tok bilong konprens i bin stat long dispela wik Mande na bai pinis tumora i kamap long Se John Guise Stadium wantaim het tok, “Christ in the Famili” o Kraus insait long Famili.

Papua ELC/PNG Distrik i karamapim Nesenel Kapitel Distrik na Sentrel provins i lukautim dispela bikpela konprens.

Siaman bilong ELC/PNG Nesenel Pastos Konprens, Pasto Ten Tengdui bilong Hagen Distrik, i tok sampela ol samtign we ol i lukluk long ol long dispela woksop em long ol woklain bilong sios, tioloji, hevi insait long ol famili na ol yangpela, na wanem samtign bai mekim long



Ol Luteran pasta mas long opim bung bilong ol Mosbi.

traim stretim, skelim ikonomi na wok bilong gavman, skelim long wokim sampela senis long konstitusen o mama lo bilong sios na kisim i go long sinod bung neks yia long Goroka na ol narapela bikpela samtign moa.

Ol lain i kam long konprens i wok long slip long Gerehu taim ol opisel bilong ol i slip long Luteran Ges Haus long Hohola.

Pasto Tengdui i tok ol bin opim konprens long las wik Sande long Palamen Haus.

Bung i kisim sapat na helpim long mani, kaikai na trespot i kam long Luteran Siping kam-

pani, Sif Jastis na jastis Minista, Se Arnold Amet, Biknem Loya i save givim gutpela helpim long sios na ol turangu, Kelly Nalu na Loa kampani bilong em, Kerenga Kua Loya na ol ELC/PNG kongrikesen insait long NCD na Sentrel provins.

Pasto Tengdui i tok wan wan kongrikesen insait long NCD na Sentrel provins i givim 5-pela pik na 200 laip kakaruk, ol gaden kaikai na ol stoa kaikai olsem hap long kaikai bilong ol lain i kam long bung.

Siaman bilong Sekyuriti komiti, Daniel Lingnoge, i tok

em i namba wan taim long Luteran Sios i go wokim lotu long haus Palamen long dediketim o pre long ol lida bilong dispela kantri.

Na em i autim bikpela tok tenkyu i go long Spika na Palamen Klak long larim ol i go na wokim preia long haus Palamen.

Em i tok dispela em i namba wan taim long planti ol pasto na ol meri bilong ol husat i save stap long ol longwe ples olsem Karamui na ol narapela hap, long sindaun long balus na tu, lukim Mosbi.

Em i tok wanpela long ol bikpela samtign we dispela sios bung i lukluk long en e mol pikinini na ol yangpela long wanem, e mol bihain taim bilong kantri. Tasol long narapela sait, planti ol trabel i kamap long sosaiti tude em ol yangpela i wokim.

Em i tok long dispela taim, ol yangpela i no lainim gutpela pasin long haus na yumi nau i mas strongim ol skul long gutpela pasin, spiritual na fisikel developmen.

Bung bai pinis long tumora wantaim liklik mini kaiserel so bikos ol pasto i sapatim kalsa insait long kantri.

## Ol nupela Jiwaka Luteran pasto kisim salens

**Paulus Tali i raitim**

SALENS i go long tupela nupela yangpela Luteran Sios pasto long bihainim Jisas olsem kepten bilong ol taim ol i karimaut wok misin bilong ol.

Hetbisop bilong Evanjelikel Luteran Sios long PNG (ELC-PNG), Reveren Giegere Wenge, i wokim dispela salens insait long konprens bilong Jiwaka ELC-PNG Distrik i bin kamap long tupela wik i go pinis long Banz Luteran stesen. Moa long 500 Luteran Sios memba bilong Jiwaka Luteran Distrik i bin kamap long dispela bung we i bin lukim tu odinesen bilong tupela nupela yangpela Luteran Sios pasto husat i wok nau long Tabi Buga Peris na Kup Peris.

Jiwaka Luteran Sios distrik em i wanpela distrik we i save karimaut planti sios wok. Em i gat dipatmen bilong ol Wokmeri, Yut, Edukesen, Wok Gutnius we ol lain long Finsafen i bin bringim i go long hap long ol yia long 1950's. Nau yet, distrik ya i wok strong long sait bilong Gutnius Dipatmen long em.

Bisop Wenge i bin opim konprens na blesim tupela nupela pasto i kisim wok long Tabi Buga peris na Kup peris na tu, em bin tokaut long Visin 2050 bilong Jiwaka Luteran Distrik.

“Yutupela yangpela bai bungim ol kain hevi long taim yupela i karimaut wok misin bilong yupela. Tasol sanap strong long wok yupela i mekim. Oltaim

givim laip bilong yupela i go long bikpela Jisas em Kepten long laip bilong yupela,” hetbisop i salensim tupela nupela pasto.

Long wankain taim tu, Bisop wenge i tokim Distrik Presiden bilong Jiwaka Luteran Distrik, Reveren William Buno, long go het karim Diwai Kruse na skruim wok i go moa yet long pasin bilong wok bung wantaim i mas

stap namel long ol narapela lida na wok bilong strongim Gutnius i go aut i ken stap na go het.

Long dispela taim tu, ol tumbuna bilong Mugang long Pindiu we ol namba wan misinari i bin karim Gutnius i go long Jiwaka i bin konsim wanpela konstitusen buk i gat ol progrem bilong sios na gavman long en.

Ol samtign i stap insait long

dispela buk em ol stia we bai helpim long kamapim gutpela sindaun bihainim Kristen pasin long nau inap long 2050.

Dispela konstitusen buk em i 5-pela yia plen bilong distrik we hetbisop Reveren Wenge i bin lonsim na tokaut olsem ol Kristen na ol lida i mas wok klostu wantaim long karimaut ol wok Gutnius insait long distrik.

## Amerika i gat 26 milien turangu lain ... Bisop bilong Nu Yok i autim wari long dispela

**Stori i kam long Zenit**

I GAT wari i stap long Katolik Sios long Amerika long ol ripot we I samtign olsem 26 milion pipel long long Amerika tude i stap olsem ol turangu lain.

Planti long yumi i save lukim Yunaitet Stets bilong Amerika (USA) olsem strongpela kantri i gat olgeta samtign na nogat manmeri i stap olsem turangu.

Tasol long las wik, hetman bilong Katolik Bisops Konprens long Amerika (USA CBC) , Asbisop Timothy Dolan, bilong Nu Yok (New York) insait long wanpela pas, i bin singaut strong long ol brata bisop bilong em long mekim olgeta samtign long level bilong ol long helpim ol lain i nogat wok i painim wok.

Na em i laikim bai ol bisop i givim bikpela tingting long hevi bilong poveti o sot long mani na ol narapela samtign na planti pipel long sosaiti bilong ol i nogat wok i stap.

“Mi bilip olsem yumi ken yusim sans yumi gat long en long olsem ol pasto, ol tisa na ol lida long fokusim pablik atensen bilong yumi long watpo tru na yumi gat planti pipel i wok long kamap turangu na watpo planti i nogat wok long sosaiti bilong yumi tude,” Asbisop Dolan i tok.

Pas bilong asbisop i go aut long ol bisop long Amerika i bihainim ripot i kam long opis bilong etministretiv komiti we i bin autim olsem 46 milien o 15 pesen long populesen bilong Amerika i stap turangu

o sot long samtign.

Asbisop Dolan i tok mak bilong ol pipel i nogat wok i no ol namba, tasol ol pipel i bungim hevi na “human dignity” o bilip long ol yet olsem manmeri i ken mekim samtign i stap daun bilo stret.

Em i tok gutpela rot long daunim hevi long nogat wok em long painim wok long kisim mani long en.

Em i tok dispela i bihainim toktok bilong Pop Benedict 16 husat i tok man i nogat wok na wetim na stap tasol long pablik na praivet helpim longpela taim i save daunim fridom na paia long mekim samtign na tu, long stap bilong em long famili na sosel sait. Na dispela i kamapim hevi long tingting na spiritual sait.

Asbisop i tok moa olsem poli-

tikel na ikonomik eria em i as long hevi i kamap long sait bilong mani hevi we Amerika na pipel bilong em i bungim long dispela taim.

Tasol em i tok em i no taim nau long sutim tok, tasol em i taim bilong olgeta lain i gat long em wan wan man, ol famili, ol sios na komyuniti grup, bisnis na leba na olgeta level bilong gavman long wok bung wantaim na kampim ol wok long daunim turangu pasin.

Em i tok olsem ol Katolik, wok bilong ol em long bildim jus na fea sosaiti na ikonomi we ol i givim kaikai long ol lain i hangere, putim long haus ol lain i nogat ples long stap long en, skulim ol yangpela pipe, welkamim ol refuji o lain i ronawe lusim asples bilong ol na lukautim ol siklain na ol lapun.



# TOK PISIN NEWS

from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## Japan gavman klostu bai larim ol pipel i go bek long ples

GAVMAN bilong Japan klostu bai rausim tambu em i putim long faipela komyuniti long ol i ken go bek long ples bilong ol klostu long Fukushima nuklia plen.

Not Esia niusman March Willacy i ripot ol i ting dispela bai kamap sampela taim dispela wik, we bai, samting olsem 30 tausen pipel bai go bek long haus bilong ol long namba wan taim stat long taim guria i bin hamarim nuklia pawa stesin.

Pastaim long ol i givim tok orait long dispela, municipal gavman i bin promis long rausim klinim na rausim olgeta posin long dispela ol komyuniti.

Long namel taim, wanpela lain bilong gavman bilong Japan i bilip 'opereta' bilong Fukushima plent bai bungim kompensesen mani long samting olsem 53 bilian dola.

## Strongpela win na ren i hamarim Filipins

OL RIPOT i kam long Filipins i tok strongpela win na ren i hamarim planti hap bilong kantri.

Ripot tu i tok wanpela yangpela boi i bin dai taim em i pundaun i go long riva long isten hap bilong kantri we Taifun Nesat i bin kamap pastaim.

Filipins i save bungim samting olsem 20 strongpela saiklon olsem long wan yia, tasol gavman i tok lukaut olsem, strong bilong dispela saiklon i bikipela na strongpela moa.

Siaman bilong Filipins Red Cross, Richard Gordon, i tok olgeta samting long kapitel Manila, i pas bikos long dispela strongpela win na ren.

## Nauru i tok em i redi long kisim ol asailam sika

NAURU i tok em i redi long thalivim Australia nau long dil wantaim isiu bilong asailam sika bikos ol nau i sainim Yunaitet Nesens Refuji Konvensen.

Insait long mun Jun, kantri i bin sainim olgeta pepa karamapim wok lukaut bilong loa long rait bilong ol pipel, wantaim tu long noken salim ol refuji i go bek long ol kantri ol i ronawe long en.

UN nau i tokaut klia long opisal aplikesen bilong ol.

Oposisen Lida bilong Australia, Tony Abbott, i laikim ol asailam sika i kamap insait long Australia long salim ol i go long Nauru we ol i ken stretim ol refuji askim bilong ol, tasol gavman i no laikim dispela aidia o tingting.



## Filipins kisim taim

OL lain manmeri long Filipins i kalap long bot taim ol i ronawe long ol ples i bagarap long taitwara long Nesat long San Mateo, Rizal, long Isten sait bilong Manila dispela wik. Taifun Nesat i pasim olgeta rot bilong Manila siti, na bikipela taitwara hevi i painim ol fam long ples.

Jastis Sekreteri bilong Nauru, David Lambourne, i tok Australia i save long tokaut bilong Nauru.

## Ol meri i ken stap long Difens Fos 'frainlain'

GAVMAN bilong Australia i makim narapela 5-pela yia long larim ol meri i stap long 'frainlain kombet' pait insait long Difens Fos.

Difens Minista Stephen Smith i tok olsem Cabinet i bin mekim dispela disisen long larim ol meri i sanap long 'frainlain'.

"Dispela em i wanpela senis we i gat strongpela sapot bilong Sif bilong Difens Fos na Vais Sif bilong Difens Fos na tripela sevis sif".

Long dispela taim, ol i pasim ol meri long aplai long sampela kain wok long Difens olsem dispela 'frainlain' bikos ol i meri.

Minista bilong Difens Pesonel,

Warren Snowdon, i tok nau dispela ol kain wok bai go long olgeta man na meri i aplai long Fos.

## SI Polis i tokim pipel long Weather Coast long stap isi

POLIS insait long Solomon Ailans i askim olgeta pipel long Weather Coast provins long stap isi bihain long ol vilis pipel i bin tro-moim ol ston long wanpela polis stesen.

Dispela polis stesen em lain RAMSI i bin lukautim nau, ol i bin redim long givim i go bek long Royal Solomon Ailans Polis Fos.

Pasifik Koresponden Campbell Cooney i ripot dispela eria, Weather Coast i bin bungim bikipela militari pait insait long taim bilong 'etnik pait' na wanpela long ol MP long rijen, David Del Pacha i tok dispela ol senis i wok long kamap hariap.

"Sapos ol i laik, ol i ken pasim ol stesin bilong ol long ol arapela provins o ol arapela konstituensi."

Tasol Deputi Komisina bilong Polis Fos, Edmond Sikua, i toke m i no klia sapos dispela bagarap long polis stesin i hap bilong ol senis bilong polis wok.

Dispela henova wok bilong RAMSI polis stesin i go long Solomons Polis Fos bai kamap long Fraide.

## Samting olsem 7-pela pipel i dai long Filipins

STRONGPELA win na ren i kamapim bikipela hevi long Filipins.

Ripot i kamap nau tasol i tok 7-pela pipel i dai insait long kapitel bilong kantri, Manila.

Filipins i save bungim samting olsem 20 strongpela saiklon olsem long wan yia, tasol gavman i tok lukaut olsem, strong bilong dispela saiklon i bikipela na strongpela moa.

Siaman bilong Filipins Red Cross, Richard Gordon, i tok olgeta samting long kapitel Manila i pas bikos long dispela strongpela win na ren.

## SI Transparency i wari long ol MP bilong kantri

TRANSPARENSI Solomon Ailans i tok wanpela trabel em famili bilong wanpela palamen memba i bungim, bihain long ol sapota bilong birua bilong en i kamap long haus bilong en, i salim toktok nogut i go long ol pipel i wok hat long traim stopim korapsen.

Pasifik Niusman Campbell Cooney i ripot olsem las wik siaman bilong Solomon Ailans Pablik Akauns Komiti, Matthew Wale, i mekim strongpela toktok agensim Gavman MP Namson Tran, bihain long em i bin kisim wanpela gavman kar na rejista long nem bilong en.

Long bekim dispela, ol sapota bilong Mista Tran i bin go long haus bilong Mista Wale na tok nogutim famili bilong en na bihain ol i go long opis bilong niuspepa i raitim stori na mekim wankain long ol.

**Pacific BEAT**

4. 5. 6am & 4pm. 5pm including sport

Listen to Radio Australia  
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



# Sekim na kalabusim ol lain i paulim mani

**G**UTPELA long harim olsem gavman i kamapim ol wok painimaut go insait long ol bikpela mani bilong kantri we i lus nabaut long kainkain wok na projek we i no bihainim stret rot o Loa na tu nogat rekot long ol wok we mani i go long ol.

Yumi save harim planti ripot na toktok long pasin bilong korapsen o stilim na paulim mani bilong kantri olgeta taim tasol yumi no save lukim tru husat i asua na go long kalabus.

Dispela em long bipo yet i kam yumi harim tasol na bel hat na toktok kros nabaut.

Sampela taim i go pinis yumi harim olsem ol politisen i bin sutim tok long ol pablik sevens we ol save i save paulim ol mani bilong kantri wantaim ol giaman ripot na pepa wok nabaut.



wanpela olupela politiks man pinis long askim em na sekim ol rekot na wok dispela mani i go long en. Polis i laik toktok wantaim tu memba bilong Kokopo Paul Tiensten husat bin minista bilong Nesanel Plening husat i go pas long pasin bilong givim aut mani long ol projek insait long kantri.

Aste ripot i kamap olsem polis i sasim wanpela bikmeri bilong Nesanel Plening long stap insait long mekim ol toktok long kisim aut ol mani long Nesanel Plening opis.

Poin bilong tok mi laik autim hia em pasin bilong sutim tok long pablik sevens olsem ol i save makim giaman pepa wok long kisim bikpela mani kam aut long gavman.

I no gutpela long sutim tok tasol long ol wokman bilong pablik sevens bikos

pawa bilong mekim disisen long givim aut mani go long wanem kain wok na projek em stap wantaim ol memba na minista long haus palamen.

Minista i gat pawa long tok orait long wanem kain wok mas kamap na amas mani mas go long en. Em gat pawa tu long rausim ol wokman bilong gavman na putim husat wokman em ting bai wok gut na wok poroman wantaim em. Olsem na yumi ken lukim olsem dispela kain pasin inap kamapim hait wok we Minista na opisa ken mekim na oraitim mani long go long en. Ol bai wanbel na mekim sampela kain projek o wok we mani bai go long en tasol yumi no klia dispela projek em trupela projek bilong helpim sindaun bilong pipel na kantri o nogat. Na wanem kain kampani o kontrak lain bai kisim dispela mani long mekikim wok? Planti hait na paul o korap pasin save kamap long dispela rot.

Olsem na noken sutim

tok tasol long ol pablik sevens. Hevi tu em memba na minista bilong palamen save go pas long en long kamapim. Planti taim em tupela sait wantaim save pasim tok na mekim samting.

Gutpela long bikpela wok painimaut wok long kamap nau na sapos husat memba o lida i bin paulim planti mani bilong kantri pinis, orait holim em na sasim em na Kot mas mekim save long em na kalabusim em.

Dispela inap sanapim piksa bai kain pasin olsem noken kamap moa long bihain taim bikos ol lida bai pret long wok painimaut bai kamap na holim ol.

Tingim, planti milien kina bilong kantri i save paia nating long kain giaman na hait wok we ol yet bai kisim na mekim bisnis bilong ol wantaim. Planti mani i lus long ol kainkain pepa wok we yumi ol liklik manmeri i no inap luksave na klia long en.

Sekim olgeta lain na kamautim ol na kalabusim ol.

## WANTOK KOMENTRI

### Prais na sefti bilong balus ron, em i bikpela samting

'BAI prais bilong balus tiket i go daun o nogat?'

Dispela em i namba wan askim planti manmeri i askim, taim gavman i tokaut las wik olsem em i wanbel wantaim tingting bilong bungim tupela namba wan balus kampani long kantri.

Faipela de bihain, dispela askim i stap yet.

Nesanel gavman, i no isi long kamapim olgeta wok bilong inapim ol tok promis bilong ol long ol pipel.

Spid bilong ol long mekim ol bikpela senis, i mekim planti manmeri i askim, watpo na bipo gavman i no mekim olsem?

Nau, gavman i tokim mipela olsem dispela marit bilong tupela balus kampani, bai gutpela samting.

Peter, na Sir Mekere, laip bilong planti manmeri bilong yumi i save bihainim prais bilong olgeta samting.

Sapos prais bilong kaikai long stua i go antap, mipela i save lukluk long maket bilong inapim kaikai bilong famili.

Taim prais bilong bensin na disel i go antap, mipela i save daunim ol ron bilong kar, bas na moto, bikos yumi no inap.

Na taim manimak bilong balus tiket i abrusim mak bilong wan tausen wan we, mipela i save tokim famili, sori tumas, mipela no inap kam lukim yupela.

Laip bilong yumi olgeta long kantri i save ron bihainim prais bilong ol samting yumi nidim.

Na Air Niugini, husat i save oltaim toktok strong olsem ol ron bilong balus i go aut long kantri i save daun moa; na Airlines PNG, ol lain i kam na opim gen ol ron i go long ol liklik ples, bai bung na kamapim wanem samting tru?

Praim minista i tok nogat wanpela wok bai lus. Em i tok planti moa ples balus bai kamap, na balus sevis bai go insait.

Mista O'Neill, dispela toktok bilong yu, i mas karim kaikai we mipela ol liklik manmeri i ken kaikai. Nogut prais bilong dispela kaikai yu tok long en, bai antap tumas long mipela i baim, na mipela bai no inap kaikai gut.

**WANTOK**  
Published Weekly, Thursday, for Word Publishing Company, Ltd.  
P.O. Box 1982, Boroko, NCD  
Papua New Guinea  
**Telephone: (675) 325 2500**  
**Fax: (675) 325 2579**  
**Email: editorial@wantok.com.pg**  
**Pe bilong wanpela yia 52 niuspepa**

<b>Ples:</b>	<b>Air:</b>
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

**General Manager:** Elizabeth Kongo  
**Editor:** Neville Choi  
Published at Portion 445, Kanage Street, Six Mile NCD

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.

# 36 yia na dring susu yet

**Bustin Anzu i raitim**

**SEPTEMBER 16 em i de i makim Papua Niugini i bin kisim independens long han bilong mama kantri bilong mipela, Australia.**

Planti selebresen o amamas i kamap long olgeta hap long kantri long makim dispela de na luksave olsem dispela de em i wanpela bikpela de long tingim olsem Papua Niugini em wanpela kantri.

Long wankain taim tu, planti manmeri i sindaun sore na wari long ol i lusim sampela famili memba bilong ol o sampela lain ol i save long ol, i lusim ol.

Na dispela taim tu em de bilong amamasim long ol nupela bebi i kam joinim famili na skruim namba bilong kantri igo antap.

Hauslain i sindaun sori na wari long dai bilong narapela na famili i sindaun na amamas long kam bilong nupela famili memba – bebi.

Dispela taim tu, planti ol save-man na meri na ol lidaman na meri i givim o mekim toktok long makim dispela de tu, lukluk long wanem samting i bin kamap pastaim, stap bilong kantri na pipel long nau na dispela bai stretim sindaun bilong ol long bihain taim olsem wanem.

Long ol bikpela siti na taun olsem Pot Mosbi na Lae, ol i lukim ol ami, polis na woda i mas wantaim ol skul pikinini na apim na daunim flag taim long ol narapela taun, ol i lukim ol bikman bilong ol insait long ol wanwan provins i givim independens toktok long ol manmeri bilong ol.

Long Goroka, independens de bilong ol i go wantaim Goroka So na planti manmeri insait long ol Hailans na Papua Niugini i go raun long so.

Long Hagen, i gat tupela selebresen i bin kamap. Wanpela long Queen's Pak na narapela em long Mount Hagen Sekenderi Skul we skul i holim long opim nupela komputa rum bilong ol.

Long Queen's Pak, Westen Hailans Provinsel Gavman i holim na Gavana Tom Olga i givim toktok.

Long Mount Hagen Sekenderi, sampela ol olupela sumatin bilong skul na ol bikman bilong edukesen i givim toktok. Sampela ol bisnisman, loman olsem Provinsel Polis Komanda bilong Westen Hailans, na praivet sinia loya tu i givim ol toktok long strongim wok bilong ol tisa na sumatin long em mas strong moa yet.

Bisnisman Michael Yapi i bin givim toktok long planti wok bisnis i go aut long ol narapela lain ausait long kantri. Dispela i lukim planti manmeri bilong ol i go ausait long kantri.

Em i tok papa bilong kantri, Gren Sif Se Michael Somare, i no rong long kisim dispela independens 36 yia i go pinis. Em i rait long kisim tasol ol yet i no lukautim gut na planti samting i no stret.

Em i tok i no asua bilong Se Michael tasol em asua bilong ol yangpela ol man na meri we ol i no ronim kantri gut.



Tambul Sumatin: Ol sumatin bilong Tambul, husait i save skul long Mount Hagen. *Ol foto: Bustin Anzu*



Singsing welda: Sampela mama bilong ol sumatin long Mount Hagen Sekenderi Skul i singsing welda long 36 independens aniveseri long skul long Fraide, Sept 16.

Planti gavman sevis i no go long ples na viles, planti ol mani i no go long ples we em inap go long en, planti ol bisnis i no ron gut long wanem, i no gat ol gutpela save lain long ronim.

Gutpela bilong taim bilong independens i kamap nau na nogut samting we ol i stap insait long en em i gutpela long kisim strong na ronim kantri.

Yapi i tok tu olsem ol noken tok ol bilong Hailans na nambis na wokim tupela grup, o tok em bilong Papua, narapela bilong Momase na Niugini Ailan na skelim i go i kam. Olgeta em ol bilong Papua Niugini.

Ol i stap long wanem hap, ol i ken mekim wok politiks, bisnis na ol narapela wok tu.

“Tingting bilong yu na wok bilong yu em mas kamap olsem wanpela Papua Niugini manmeri. I no olsem yu bilong narapela hap graun o bilong narapela hap kantri. Yu gat rait long stap long wanem hap yu stap

na wok long en, long wanem, em long nem bilong kirapim kantri,” em i tok.

Em i tok kantri em i no inap senis em yet, tasol em bai nidim save na wok bilong olgeta manmeri bilong kantri long lukim ol dispela senis.

Em i tok ol yet mas kamap papa long ol dispela samting na noken ting olsem ol narapela bai kam wokim bilong ol.

Olsem na em i givim strongpela salens igo long ol sumatin long mas skul gut na ino ken les na westim taim bilong ol.

Suprintenden Kaiglo Ambane i toktok long ol sumatin long pasin bilong laikim narapela na mas skul gut long kamap sampela gutpela lida man na meri insait long kantri.

Em i givim toktok long strongim ol long noken smuk marijuana na dring stim o hom bru long wanem, em bai bagarapim gutpela tingting bilong ol.

Em i tok tu olsem taim mama i karim ol, ol i no kisim nem bilong ol

olsem drag bodi o stim bodi, nogat. Ol yet i kisim dispela nem na taitol.

Ol mas senisim dispela kain tingting na pasin bilong ol.

Danny Gonol, sinia loya bilong Norum Lawyers long Hagen i skelim ol eksperiens bilong em long skul na wok bilong em long go wantaim dispela de bilong amamas.

Em i tok taim em i groap long ples bilong em long Alkena, long Tambul, em i ting olsem em bilong dispela hap tasol na i no bilong narapela hap.

Bihain long go long Hai skul long Tambul, em i ting em bilong dispela hap. Ai bilong em i op olsem em bilong Westen Hailans taim em i go long Sogeri Nesenel Hai Skul na go skul Lo long Yunivesiti bilong Papua Niugini long Pot Mosbi.

Het bilong em i luksave olsem em bilong Papua Niugini taim em i go long Melbourne long Australia na lus long wanpela rot o strit na sampela lain Tolai na Buka i kisim

em i go na sori long en, olsem em wantok bilong ol.

Long dispela taim, em i save olsem em i no bilong Alkena, Tambul o Westen Hailans, tasol em bilong Papua Niugini stret!

Tasol em i no amamas olsem kantri i no stap em yet long planti ol gutpela samting kantri i gat na wok long stap long kisim helpim, paulim samting na kra i yet long ol dispela helpim.

Em i givim wanpela tok piksa long tupela marit, husat i gat 36 krismas.

Tupela wantaim i tisa na bikpela pikinini man bilong tupela i mekim Gret 12 na i gat 18 krismas, namba tu boi i mekim Gret 10 na i gat 16 krismas, narapela meri long Gret Seven, liklik long Gret 4 na narapela papela i stap long haus wantaim papamama.

Wanpela bilong dispela tupela em dring susu yet.

Em i stori olsem ol i bilong wanpela Ailan long Niugini Ailan na ol



Danny Gonol: Sinia praiwet loya bilong Norum Lawyers Danny Gonol i mekim wanpela poin long dispela taim bilong toktok.



PPC Ambane: Superintenden Kaiglo Ambane i givim toktok.



Michael Yapi mekim sampela toktok.



Ol yangpela gels bilas long bilum klos i makim 36 krismas Independens long Pot Mosbi. Poto: Nicky Bernard

laik go holide long bikples bilong ol na pulumapim bot bilong ol long olgeta samting, we ol bai yusim long taim ol i stap holide.

“Long bik moning ol i kisim bot i go aut long go long bikples. Wanpela samting papa i no sekim gut em zoom bilong bot. Ol i ron yet i go na zoom i pinis nau. Long dispela taim i nogat sampela narapela bot i ron klostu o em i ken luksave.

“San i wok long go daun na bikpela hai tait tu i wok long kirap na surukim bot i go aut na longwe liklik nau,” em i stori.

Em i tok bot i go long we liklik long ol Ailan stap klostu na ol i no inap luksave long bot nau. Nait i kirap pinis na ol i wok long drip antap long solwara nau.

Long neks de, ol i lukim olsem ol i go longwe tru long ples na ol i no inap lukim gen Ailan bilong ol na ol i paul olgeta.

“Ol pikinini i hangre na ol i stat long kisim ol kaikai na kaikai. Tupela nait i abrus na i go namba tri na i go yet.

Bihain long wanpela wik, em i tok, ol kaikai samting i pinis na ol i

no inap mekim wanpela samting na ol i wok long drip yet. Long dispela taim, ol i kisim solwara na dring na painim ol pis na kaikai nupela na i wok long drip yet.

Bihain long 4-pela wik, olgeta samting bilong givim ol strong i pinis nau.

Long dispela taim, liklik bebi i susu yet. Narapela bikpela bilong em i joinim em na susu wantaim. Narapela Gret 4 i painim hat na em i kra i planti na mama bilong em i oraitim em long go susu wantaim narapela tupela.

Gret 7 em klostu laik dai na em laik kalap i go daun long wara. Tasol mama bilong em i tok, “Em orait pikinini, kam joinim ol narapela brata bilong yu na dring susu wantaim.”

Gret 10 i lukim dispela ol liklik bilong em i lainap long mama bilong ol na em i les, tasol em i hangre nogut tru na em i laik dai.

Mama i sori na tok; “Em dispela susu tasol yu dring na yu kamap so kam na dring.” Em i go joinim ol tripela liklik bilong em na dring susu tu.

Gret 12 mangi i helpim papa bilong em na pedal na givim sapot long em tasol ol strong bilong em i pinis na em i lukim olsem em bai lusim ol famili na redi long klap i go autsait long bot.

Mama i sori na tokim em long joinim olgeta liklik bilong em. Na em i go dring susu bilong mama bilong em.

Papa tasol i stap aut na traim olgeta strong bilong em long painim wanpela Ailan.

Em i lukim wanpela Ailan i poin i go antap, tasol em i nogat strong bilong em long go long dispela hap na em tu laik dai.

Em i tingting long askim meri bilong em tasol em i sori long em long wanem, em i lukautim olgeta pikinini bilong em.

Tasol, em yet i no inap sanap strong moa. Bun bilong em i slek na nogat strong moa long pedal.

Em i laik askim mama bilong ol pikinini tasol em papa tumas na em sem. Mama i luksave long tingting bilong man bilong em na tokim papa long joinim ol pikinini bilong em. Papa i kisim strongpela win na go

joinim ol pikinini bilong em long dring susu tu.

Moning, olgeta i kisim strong pinis na pedal igo long dispela Ailan.

Taim ol i kalap kam aut long nambis bilong dispela Ailan, mama bilong ol i dai!

Gonol i givim dispela piksa long kantri Papua Niugini na ol pipel bilong em.

Ol i kisim independens 36 yia i go pinis tasol ol i kisim sapot o eid long ol narapela kantri yet.

Dispela i soim olsem Papua Niugini i susu yet.

Gonol i tok, Papua Niugini i kisim independens isi o nating tru. I nogat pait na manmeri i dai na kisim independens long baksait long blut bilong ol manmeri.

O olsem ol narapela kantri, we planti samting i bagarap na kisim independens.

Papua Niugini i kisim nating long “golden plet”.

“Na dispela em histori bilong em yet,” Gonol i tok.

Em i tok planti samting nau i no bihainim kain tingting bilong wok na

laipstail long taim bilong independens. Bipo long independens, long taim bilong ol waitman, olgeta samting i ron gut tasol dispela kain sevis i no moa stap long taim bilong mipela.

Olgeta samting nau i no ron gut long wanem, ol manmeri i laik kamapim biknem bilong ol yet na i no tingting olsem wanpela man o meri Papua Niugini.

Taim Ges ov Ona na namba wan spika, Malcolm Culligan i laik toktok, ol mangi i stat ron i go antap long gris pol we ol i putim sampela samting antap long em.

Planti manmeri i bikmaus lap long dispela mangi i laik go antap long diwai na ol ino bisi long toktok bilong Provinsel Administreta bilong Westen Hailans.

Prinsipal bilong skul John Pamme tu i laik stopim ol mangi long goap long gris diwai tasol em tu i nonap. Culligan i go bek, kisim spika na mekim sampela las toktok na bihain pasim dispela liklik so bilong amamasim 36 independens selebresen.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing blong bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - NIUS - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Privu
7:05PM Musik na Chit Chat

SANDE - Nait
7PM Stesen op - Ol Nius Hetlain/Program Privu
7:05PM Musik na Chit Chat

Raun wantaim Wantok kru ...

Wan Solwara Musik Festival

Nicky Bernard i raitim

POT MOSBI bai lukautim wanpela bikpela musik festival long namba 8 de bilong mun Oktoba.

Unplugged Stereo, wanpela lokal kampani na FM100 bai lukautim dispela musik festival.

bilong bipo na tu musik bilong ol pasifik olsem Mele-nesen kantri. Runaweryi, tok tu olsem, planti bilong yumi Papua Niugini i wok long lus tingting long ol olupela ben bilong yumi long kantri, em tok ol dispela olupela lain em mekim musik bilong yumi kamap strong long pasifik.

Fiji, Tabura ben, bai karim nem bilong Vanuatu, LZP ben, bilong Bougainville (ARB), Telek, Anslom na Feedback ben bilong yumi long Papua Niugini. Edou em wanpela musik man bilong Nu Kalodonia(New Caledonia) bai stap insait long dispela musik festival, dispela nait Unplugged Stereo na FM100 i givim go wanpela olupela ben bilong yumi long Papua Niugini em Barike ben long tingim tupela tru pela man bilong musik em John Wong na Glen Low

husat tupela kamapim dispela ben Barike na nau yumi olgeta man save. Andrew Runaweryi i tok nogat wanpela bikpela sponsa i kam na helpim tasol em tok tenkyu i go long ol liklik lain husat i gat tingting long ol olupela ben na musik manmeri long Pasifik, ol kain lain olsem, Mangrove Produc-

tions, Alliance Francaise, Blue Butterfly Agency, Patti Potts, Tent Manufacturers, Trila Ltd na Kokoda Water. Sapos yu laikim tiket harim tasol FM100 na bai yu save long wanem hap long kisim, K30 long taim yu bai long wanem hap ol toksave na K40 long get long dispela nait.



Tabura - Vanuatu



Edou - New Caledonia

93FM YUMIFM National Weekly Hit Parade. Produced & Host by: Kasty. Schedules: Talaigu Sophie & Poroman Crew. Week Ending: Saturday - 01st October 2011. Charting table with columns: Week Before, Last Week, This Week, Charting Song, Artist.

EMTV Television Guide

FONDE, SEPTEMBER 29, 2011
5.00AM G JOYCE MEYER
5.30AM G TODAY
9.00AM G MALOLO CLUB

(final for 2011)
11.00PM AUSTRALIA NETWORK
FRAIDE, SEPTEMBER 30, 2011
5.00AM G JOYCE MEYER
5.30AM G TODAY
9.00AM G MALOLO CLUB

10.00PM G RUGBY WORLD CUP DAY 18 HIGHLIGHTS
11.45PM G A CURRENT AFFAIR
00.15AM G NATIONAL EMTV NEWS REPLAY
12.20PM AUSTRALIA NETWORK

12.00AM AUSTRALIAN NETWORK
SANDE, OKTOBA 2, 2011
6.30AM G IT IS WRITTEN
7.00AM G HILLSONG
7.30AM G RUGBY WORLD CUP DAY 19 HIGHLIGHTS

ney (LIVE)
6.00PM G NATIONAL EMTV NEWS
6.30PM G DIGICEL STARS
7.30PM G 60 MINUTES
8.30PM M SUNDAY NIGHT MOVIE: PANIC AT ROCK ISLAND (PREMIERE)

TORO



BIABIA



KANAGE



TOKWIN

Bai yu stap long kot sapos yu kempen eli

Ileksen bai kam long namel long yia i kam, sapos yu laik sanap long wanpela Iektret yu mas wet inap Elektrol Komisin givim tok orait long kempen.

Sapos yu kempen nau na ol manmeri repotim yu, yu bai kisim bikpela mekim save long kot na tu yu ken go kalabus.

Olsem na tingting na mekim samt- ing stret, nogut yu wetim bikpela mani na nogat kaikai bilong em, tokwin toksave tasol.

Ol bikpela Kampani nogat luksave long

Musik Festival.

Yumi Papua Niugini gat ol bikpela kampani long kantri bilong yumi, sampela taim bai ol kam aut na spon- sarim sampela samting ol laikim.

Wanpela bikpela konset bilong musik bai kam long namba 8 de bilong mun i kam, tasol nogat wanpela gutpela na bikpela sponsa bilong em, tragu ol liklik bisnis haus na wanwan manmeri husat i save sapotim musik bilong Pasifik i helpim long kamapim dispela musik festival, Tokwin wanbel stret long ol dispela lain.

Bilas gut tasol noken kalap long PMV bas

Wanpela rait mangi laik go long wan- pela wok bilong em long Vision City long 6 kilok long avinu, rait mangi i

bilas olsem wanpela memba o pala- men minista.

Boi lusim haus bilong em long Rainbo wantaim blek pela sot bilong ol man na nek tai, boi go sanap long bas stop na wanpela bas i kam stop, boi putim lek tasol na go kalap na sin- daun long wanpela sia.

Taim bos kru askim long bas fe, boi givim 60tea, bos kru kirap na askim em bai yu go we, boi bekim na tok " Mi bai go daun long Vision City", bos kru lukluk strong na tokim em, "Yu bilas gut tru ya na au yu baim 60? Boi kirap na tokim bos kru, "Yu kisim 50t long ol lain bai go daun long Waigani ya, mi putim 10t go antap long wanem bai yumi lusim Waigani liklik tasol na bai yumi kamap long Vision City ya" bos kru maus bilong em pas olgeta.

Tokwin tasol

Word search grid with letters K, U, N, A, I, K, K, A, B, I, S, K, I, I, A, U, B, E, T, U, R, A, I, S, A, D, F, H, O, U, S, E, A, M, B, C, A, S, D, P, T, R, K, A, D, K, I, M, K, K, A, A, D, C, P, W, O, A, T, U, A, J, O, I, L, U, M, R, N, H, R, E, I, P, I, Z, C, S, O, N, S, O, K, E, I, A, H, Y, A, D, O, V, O, N, E, R, A, M, F, A, N, T, N, F, H, I, I, D, O, U, L, A, U, S, H, J, M, E, A, A, P, O, B, S, C, B, N, M, K, P, L, I, E, B, K, P, K, O, N, I, P, I, T, P, I, T, Q, E, T, G, A, M, D, B, I, L, K, H, D, S, A, C, N, I, N, R, A, M, A, A, I, S, C, A, N, I, E, N, I, O, E, R, N, L, M, P, K, N, A, S, D, F, G, H, J, K, L, M, N, O, I, P, I, A, J, K, Y, A, M, B, O, I, E, S, K, A, I, P, A, K, C, D, I, R, T, Y, I, O, M, M, L, P, O, T, E, T, O, P, R, P, L, A, U, L, A, U, E, N, G, R, E, A, N, Y, K, I, O, R, F, C, E, W, I, N, M, A, N, G, O, T, O, P, P, K, O, P, R, A, P, E, A, W, A, W, A, R, S, A, M

Painim ol dispela nem bilong ol diwai prut na gaden kaikai:

Word list table with columns: KUNAI, BANANA, BIN, BUAI, MARITA, DAKA, KAPIAK, KABIS, TAPIOK, POPO, KAKAO, KOKONAS, DRAI, KULAU, GALIP, DRIP, KOPRA, KOPI, KON, PAINAP, KUMU, KUKAMBA, PITPIT, KAWAWAR, POTETO, AIBIKA, YAMBO, LAULAU, MANGO, PAMKEN, MELEN, MON, ANIAN, MULI, RAIS

9x9 Sudoku grid with numbers 9, 2, 7, 6, 8, 7, 1, 9, 4, 2, 7, 5, 8, 6, 5, 9, 3, 2, 4, 1, 8, 2, 9, 6, 2, 1, 4, 7, 3, 7, 1, 4, 8, 2, 9

9x9 Sudoku grid with numbers 3, 8, 5, 2, 6, 4, 7, 9, 1, 6, 1, 9, 7, 3, 8, 4, 2, 5, 4, 7, 2, 5, 9, 1, 6, 3, 8, 2, 4, 6, 8, 5, 3, 9, 1, 7, 7, 5, 1, 4, 2, 9, 3, 8, 6, 8, 9, 3, 6, 1, 7, 2, 5, 4, 5, 6, 4, 3, 8, 2, 1, 7, 9, 9, 3, 8, 1, 7, 6, 5, 4, 2, 1, 2, 7, 9, 4, 5, 8, 6, 3

Ansa bilong las wik Sudoku

Ansa bilong las wik Pasol

Word search grid with letters M, M, U, S, M, U, S, L, P, B, I, N, E, N, M, U, M, U, T, N, A, L, U, L, R, A, L, U, T, A, S, E, U, K, E, D, O, N, K, Z, I, M, B, K, A, F, E, S, K, P, U, S, I, O, T, B, I, M, I, J, S, I, P, S, I, P, O, N, A, O, A, S, A, P, B, I, U, K, T, O, P, K, A, A, S, N, E, K, A, S, A, A, L, D, O, K, P, G, R, A, U, L, P, K, A, E, A, R, U, K, G, R, L, G, B, A, L, G, N, T, P, U, K, P, U, L, A, A, A, N, I, S, B, U, L, M, A, K, A, U, L, B

EMTV Television Guide

12.30PM EMTV MIDDAY NEWS DEPT OF EDUCATION CLASSROOM BROADCAST CONTINUES... 1.00 - 1.40PM GRADE 6 MATHEMATICS 1.50 - 2.30PM GRADE 6 SCIENCE 2.30 - 3.00PM DEPI PROGRAMME STATION OPEN KIDS KONA 3.00PM G MAGICAL TALES 3.30PM G HI-5 4.00PM G THE PYRAMID 4.30PM G THE SHAK 5.00PM G RUGBY WORLD CUP DAY 20 HIGHLIGHTS 5.55PM G CRIME STOPPERS 6:00PM G NATIONAL EMTV NEWS 7:57PM EMTV TOK SAVE 7:30PM G RUGBY WORLD CUP WALES v FIJI Venue: Hamilton, New Zealand. 9.30PM G RUGBY WORLD CUP WEEK 4 HIGHLIGHTS 10.30PM G NATIONAL EMTV NEWS REPLAY 11.30PM G MOBIL 1 THE GRID AUSTRALIA NETWORK 12.30PM

5.30AM G TODAY DEPARTMENT OF EDUCATION CLASSROOM BROADCAST 9.00 - 9.40AM GRADE 7 MATHEMATICS 9.50 - 10.30AM GRADE 7 SCIENCE 10.40 - 11.15AM GRADE 8 MATHEMATICS 11.20 - 12.00PM GRADE 8 SCIENCE 12.30PM EMTV MIDDAY NEWS DEPT OF EDUCATION CLASSROOM BROADCAST CONTINUES... 1.00 - 1.40PM GRADE 6 MATHEMATICS 1.50 - 2.30PM GRADE 6 SCIENCE 2.30 - 3.00PM DEPI PROGRAMME 12.00PM EMTV MIDDAY NEWS 3.00PM G MAGICAL TALES 3.30PM G HI-5 4.00PM G THE PYRAMID 4.30PM G THE SHAK 5.29PM G EMTV NEWS UPDATE MILLIONAIRE HOT SEAT 6:00PM G NATIONAL EMTV NEWS 7.00PM G HAUS & HOME 7.57PM EMTV TOK SAVE 8.00PM G KINGAL MINISTRIES 8.30PM PG THE FARMER WANTS A WIFE (SERIES PREMIERE) 9.00PM M 24 Kiefer Sutherland stars in this Emmy Award-winning drama in which the entire season takes place in one

day, with each of the 24 pulse-pounding episodes covering one hour and presented in real time. Kiefer Sutherland stars in this Emmy Award-winning drama in which the entire season takes place in one day, with each of the 24 pulse-pounding episodes covering one hour and presented in real time. 11.30PM G EMTV NEWS REPLAY AUSTRALIA NETWORK TRINDE, OKTOBA 5, 2011 5.00AM G JOYCE MEYER Religious Program 5.30AM G TODAY DEPARTMENT OF EDUCATION CLASSROOM BROADCAST 9.00 - 9.40AM GRADE 7 MATHEMATICS 9.50 - 10.30AM GRADE 7 SCIENCE 10.40 - 11.15AM GRADE 8 MATHEMATICS 11.20 - 12.00PM GRADE 8 SCIENCE 12.30PM EMTV MIDDAY NEWS DEPT OF EDUCATION CLASSROOM BROADCAST CONTINUES... 1.00 - 1.40PM GRADE 6 MATHEMATICS 1.50 - 2.30PM GRADE 6 SCIENCE 2.30 - 3.00PM DEPI PROGRAMME 12.00PM EMTV MIDDAY NEWS 3.00PM G MAGICAL TALES 3.30PM G HI-5

4.00PM G THE PYRAMID 4.30PM G THE SHAK 5.29PM G EMTV NEWS UPDATE 5.00PM G RUGBY WORLD CUP DAY 9 HIGHLIGHTS 5.55PM G CRIME STOPPERS 6:00PM G NATIONAL EMTV NEWS 7.00PM PG THE WORLD AROUND US ONE MAN: Nelson Mandela Nelson Mandela is a shining example of what one man can do to change the world. Born into an oppressive regime, he fought to overcome prejudice and hate to unify a nation. Nelson Mandela's dedication resulted in his inauguration as the first black President of South Africa: his award of the Nobel Peace Prize and ultimately, his role in overthrowing the Apartheid regime. 7.57PM EMTV TOK SAVE 8.00PM PG SURVIVOR SOUTH PACIFIC - The twenty-third instalment of Survivor, with Emmy Award-winning host Jeff Probst. 18 Castaways are divided into two tribes: the Savaii Tribe & the Upolu Tribe named after two Samoan islands. Two former Sur-

vivors are back to try for a second chance to win \$1 million prize. Also returning is The Redemption Island twist. The winner of each duel earns the right to continue fighting for a chance to return to the game and compete for the title of Sole Survivor. The loser is sent home. Who will be left standing? 9.00PM PG WEDNESDAY NIGHT MOVIE: THE MAJESTIC (2001) Drama/Romance - set in 1951, a blacklisted Hollywood writer gets into a car accident, loses his memory and settles down in a small town where he is mistaken for a long-lost son. - Stars: Jim Carrey, Martin Landau and Bob Balaban. 11.45PM G NATIONAL EMTV NEWS REPLAY 1.00AM AUSTRALIA NETWORK

Ol Program na Kilok i ken senis oltaim...

## Raun wantaim Kanage olgeta wik



**NEM:** Kisip Kembo

**KRISMAS:** 19 (man)

**ADRES:** ST. John De Baptist Primary School, P.O. Box 220, Kerema Gulf Provins

**SAVE LAIKIM:** Pilai spots, watsim muvi, go Lotu, ridim buk na mekim pani

**NEM:** Isaiah Bonga

**KRISMAS:** 28 (man)

**ADRES:** P. O. Box 407, Popondetta, Oro Provins

**SAVE LAIKIM:** Pilai Voli bol, Tas ragbi, pilai gita, lukluk TV( NRL), raitim pas, mekim na go Lotu

**NEM:** Rian Monghongo Alphonse

**KRISMAS:** 18 (man)

**ADRES:** Aniep Village, C/- ST. Mary's, P.O. Box 125, Leitre, Vanimo, Sandaun Provins

**SAVE LAIKIM:** Harim musik, pilai soka, voli-bol, basketbol, go Lotu na mekim pren

**NEM:** Anestine Funumari

**KRISMAS:** 18 (meri)

**ADRES:** Notre Dame Secondary School, P.O. Box 164, MT Hagen, WHP

**SAVE LAIKIM:** Ridim Baibel, singsing, harim musik, pilai basketbol, netbol, mitim ol poroman na lukluk TV.

**NEM:** Koron Amun

**KRISMAS:** 25 (man)

**ADRES:** P.O. Box 3079, Lae, Morobe Provins

**SAVE LAIKIM:** Harim musik, pilai Kompyuta, ridim buk na mekim pren

**NEM:** Kaiya Yoan

**KRISMAS:** (man)

**ADRES:** C/- Bema Primary School, P.O.Box 37, Kerema Gulf Provins

**SAVE LAIKIM:** Pilai soka, mekim Jokes na pilai volibol wantaim ol poroman

**NEM:** Ruben Yawa

**KRISMAS:** 18 (man)

**ADRES:** Muli Primary School, P.O. Box 69, Mendi, SHP

**SAVE LAIKIM:** Harim musik, pilai soka, basketbol, volibol, ragbi tas na mekim pren wantaim wanpela Lotu man o meri

**NEM:** Stanson Petiti

**KRISMAS:** 20 (man)

**ADRES:** C/- BSC ANZ Bank ( PNG) Ltd, P. O. Box 1152, Port Moresby NCD Papua Niugini

**SAVE LAIKIM:** Pilai Gita, ridim Baible, mekim fani na stori wantaim ol poroman

**NEM:** Joel Kenis Amaekam

**KRISMAS:** 29 (man)

**ADRES:** Huon Gulf, Lae 411, P.O. Box 164 Lae, Morobe Provins

**SAVE LAIKIM:** Mekim fani, eksasais, pilai lilik, pilai ukulele, gita, singsing, skerim tok wantaim narapela liklik, ritim baibel, komik, harim Radio Lait na Katolik FM, na painim wanpela meri long maritim na stap oltaim.

**NEM:** Anne Mary Yuwei

**KRISMAS:** 21(meri)

**ADRES:** Pes Primary School, P.O. Box 36, Aitape, Sandaun Provins

**SAVE LAIKIM:** Pilai soka, Volibol, mekim pani, go Lotu, harim musik na watsim TV.

## Stail kilim em

TAIM Kanage i liklik boi yet, papa bilong em i save kisim em i go raun long Ela Bis long Mosbi. Wanpela taim em wantaim pap i go raun i stap na lukim wanpela geligeli man (ol man husat i save luk olsem ol meri) i wokabout i kam. Dispela man tu i bilong Hanubada na em i stailim stret wokabout bilong em. Boi sakim as na wokabout olsem wanpela pato stret. Taim Kanage i lukim olsem, em i ting olsem wanpela meri na askim papa bilong em Yendefande, "Hei papa, dispela meri i luk narakain stret ya?" em i no gat susu olsem bilong mama. Ating em i mas gat sik ya." Kwik taim tru papa bilong em i sarapim em na tok, "Pasim maus bilong yu, yu liklik tumas na yu no save. Dispela kain meri ol i save kolim ol faul bodi. Ol tewel bilong Papua i wokim ol krange long taim bilong ren stret, olsem na em i nogat susu. Ol tewel i wokim em long haphap samting bilong



ol man, meri na enimol bilong bikbus. Dispela kain meri i no save pispis na pekpek." Kanage i harim dispela na bilipim stret papa bilong em.

**Dodo na Chester Kila**

## Yu mas rongrong ya

KANAGE raun long Eriku long Lae i stap na em i harim sampela man i singaut olsem "Oyo.....ol ari yet." Dispela em taim ol i lukim ol yangpela meri Buang i pulim longpela lain na raun i stap. Kanage harim olsem na kros olgeta, bikos em i ting ol i paul na kolim nem bilong ples bilong em long Ali ailan long Wes Sipik Provins. Boi go tasol na askim wanpela man i sanap poromanim Papindo stua i stap.

"Brata, ol lain ya i kolim Ari, em long Wes Sipik o?" Em nau man ya i go na askim ol Buang. Wanpela bilong ol i kam tasol na tokim Kanage, "Oroman, ating yu mas rongrong ya. Ari em i kantri sait bilong ol Buang ya." Kanage harim olsem na sem wantaim na tekov.

**Awa Giame & Erika Nunu Wan Mail- LAE.**

## Ol skwat!

Salim ol gutpela Kanage tok pilai i kam long:  
**Kanage Tok Pilai**  
 P.O. Box 1982,  
 Boroko, NCD  
 Port Moresby.  
 Email: [atolire@wantok.com.pg](mailto:atolire@wantok.com.pg)

# No mekim bikpela wok, tasol bai kamap ris

## Dia Laipain

**Mi kisim pinis planti pas long wanpela fainensel institusen bilong ovasis i askim mi long kamap wanpela memba. Papa bilong institusen i rait pinis long mi 5-pela taim, taim mi no givim bekim long askim bilong em long mi salim K10,000 i go long em. Em I laikim bai mi transferim dispela mani i go long beng akaun bilong em.**

**Taim mi salim pinis mani long beng na mi kamap fainensel memba, bai mi kisim US\$1 milion. Mi no klia sapos bai mi salim mani o bilip long ol kain pas i kam long ovasis institusen.**

**Mi laikim stia tok bilong yu long helpim mi long mekim disisen bilong mi.**

## TRUTH SEEKER

## Dia Pren

MIPELA i wari long harim dispela long yu, na yu paul long dispela kain promis olsem bai yu kisim bikpela mani na kamap ris kwiktam long PNG na ovasis. Mipela i harim pinis na i wok long harim yet long sampela ol fainensel skim bilong ovasis i laikim bai ol PNG i go insait long ogenaesen bilong ol. Em i wok long kamap long kantri bilong yumi tu.

Mipela i bilip olsem man i laki long mekim bikpela mani hariap long sotpela taim. Tasol pastaim, glasim ol pas yu kisim na ol promis long kisim bikpela mani bihain tasol yu peim K10,000.

Pren, bipo yu go het long huk ap wantaim ol o nogat, mipela i laik putim sampela askim long yu.

Dispela fainensel institusen i bin kisim nem na etres bilong yu olsem wanem na ol i wok long salim ol pas i kam long yu? Taim yu ritim ol dispela pas, yu save gat wanem kain tingting?



Sapos yu tromoim K10,000, yu bilip olsem bai yu kisim mani ol i promisim yu long en? Yu save tu long ol narapela lain i bin go insait long kain skim olsem na em i kisim mani we skim i promisim ol long en?

Wanem samting bai kamap sapos yu salim K10,000 long dispela kain skim tasol yu no kisim mani we ol i promisim yu long en?

Long dispela kain skim long PNG o long ovasis we ol i save promisim bikpela mani, mipela i askim yu sapos yu ken karimaut wok painim long em bipo yu go het na salim mani bilong yu i go long ol. Mipela i wok long lukim planti lain husat i bilip olsem dispela em i rot long mekim planti mani na kamap ris hariap.

Sori, tasol em i tru na planti lain long PNG i bungim hevi long ol dispela kain mani skim. Yu laik kamap wanpela bilong ol? Mipela i givim yu sampela eksampel long ol dispela, kain olsem U-Vistrak, Mani Rain na ol narapela moai kamap pinis long PNG. Ol i stap we nau? Sapos yu no laik go insait long ol dispela kwik mani bisnis, mipela i tokim yu nau long lus tingting long salim mani bilong yu long kain mani skim ovasis.

Yu no wok long bekim ol pas bilong ol i min olsem samting i wok long tokim yu long nokenna ol samting i no tru. Tasol mipela i tokim yu long glasim gut wanpela moa taim wanem samting yu laik mekim wantaim mani bilong yu.

Pren, yu yet yu save hau yu kisim mani na i moabeta yu yusim dispela mani long kisim gutpela samting long laip bilong yu na ol narapela lain famili bilong yu.

Mipela i save olsem i no olgeta fainensel institusen long PNG na ovasis i no gutpela. Tu, mipela i luk-save olsem planti ol kain skim i kamap long PNG na wol tude. Na sampela bilong ol i gutpela na sampela i nogat.

Long dispela na Gavana bilong Beng bilong PNG i save putim ol pablik awenes long ol mani skim bisnis, wanem ol i trupela na wanem bai yumi mas lukaut long ol. Tasol maski ol tok lukaut olsem i kamap, pipel i no harim tok na ol i go het joinim ol skim na tude, ol i weit yet na pre i stap long kisim kaikai bilong ol long ol mani skim.

Mipela i strongim yu long save long Papa God husat i bilip long ol dispela husat i wok hat long kaikai wantaim mani ol i hat wok long kisim. Tasol em i no save givim blesing long ol lesman.

Las em, yu gat mani tasol i moabeta yu tingting gut na investim gut mani bilong yu na yu na famili bilong yu bai kisim gutpela blesing.

Mipela i lusim yu wantaim dispela Baibel Ves long Buk bilong Provebs Sapta 20 es 18. Em i tok "Kisim gutpela stiatok na bai yu mekim gut, noken go long pait sapos yu no wokim plen". I moabeta yu kisim helpim long wanpela fainensel institusen long kisim stia long rot we yu ken yusim mani bilong yu we yu wok hat long kisim.

God i ken givim yu gutpela save.

**Laipain**

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

**Laipain**





# Suprim Kot rausim aplikesen bilong lain husat laik stopim DSTP

**SUPRIM** Kot o bikpela kot tru long kantri long Fraide, Septemba 23 i bin rausim kot aplikesen bilong ol lain husat i laik stopim wok bilong Ramu Dip Si Teilings Plesmen (DSTP) long Raikos distrik long Madang provins.

Dispela kot i lukim olgeta lain i sindaun long harim we i lukim Jastis Sakora, Jastis Gabi na Jastis Hartshorn i givim oda long ol lain husat i bringim dispela long kot (ol apelements) long peim kos bilong ol lain ol i salensim ol. Ol bai peim kos bilong Ramu NiCo MCC Limited, Stet na Dokta Wari Iamo, husat em Seketeri bilong Envairomen na Konsevesen.

Kot i mekim disisen olsem aplikesen ol lain apellent i givim em ol i rausim bihain long luk-save bilong kot olsem rot o proses we ol lain apellent i go long en i no bihainim stret oda bilong dispela kot na ol i mekim dispela samting olsem ol oda bilong kot i no strong ol i no stap.

Jastis Cannings long Nesanel Kot long Madang long Julai 26 long dispela yia i tok nogat long askim bilong ol dispela lain em Louis Mediang bilong Raikos i go las long en long stopim DSTP long kamap long Ramu NiCo Projek long Basamuk long Raikos long Madang provins. Ol lain apellent i apil i go long Suprim Kot long wan kain taim gen long stopim DSTP operesen taim apil i stap yet.

Namba wan taim tru ol lain bilong Medaing i putim aplikesen long kot na kot i bung na i rausim long Ogas 19 2011. Kot i bin rausim aplikesen bilong ol bikos loya bilong ol i kamap leit long harim dispela spesel kot. Bihain long dispela wanpela aplikesen bilong ol seim lain em kot i putim long sait wantaim narapela intalokutori aplikesen we olgeta jas i sindaun na rausim long Septemba 2. Taim dispela ol aplikesen em kot i putim long sait i stap yet, ol lain ya i aplai long namba 3 injangsin aplikesen long Septemba 2 na bihain namba 4 amended injangsin aplikesen long Septemba 9.

Bihainim toktok pastaim bilong Sif Jastis, Salamo Injia, Suprim Kot i givim tai mi go Oktoba 3 na 4 long kot i harim substantiv apil bilong dispela keis.

Bikpela multi-bilien Kina Ramu Nikel Projek long Madang provins i lukim olgeta bikpela wok i sanap pinis na dispela i kos mani olsem US\$1.4 bilien (K3.2 bilien), na wok redi stap pinis long komisinging i kamap long namba wan hap bilong yia 2010, tasol kot i bin kamap long Nesanel Kot long Madang na dispela i surikim taim bilong komisanim i go longpela taim tumas.

Pastaim long stat bilong konstraksin wok i kamap long PNG LNG projek long kantri, invesmen bilong MCC long Ramu projek i bin bikpela singel invesmen tru insait long 1990s i kam olsem.

Ramu NiCo (MCC), long bringim naispela lait na gutpela sosel na ekonimik sevis i go insait long dispela rurel komyuniti antap long

## .....lain bilong Louis Medaing bai peim kos bilong Stet na Ramu NiCo



Ol wokman bilong Ramu NiCo, Nick Genaia (raithan) wantaim Dubam i sanap arere long intanesenel sip bris long Basamuk.

maunten na kol ples bilong Kurumbukari (KBK) na tu long nambis long Basamuk insait long Raikos distrik long Madang provins.

Lait i min olsem rot i go long ol viles na hauslain na tu bris i ron abrusim bikpela Ramu Wara. Dispela em sevis gavman i no bin kamapim insait long 36-yia bipo maski kantri i kisim independens.

Ples we bus na bikpela diwai i karamapim antap long maunten bipo nau i gat planti kain kain stail nupela ol bilding na haus na rot. Moa long en tu nupela bris i ron katim bikpela Ramu Wara na ol pipel i ken yusim kar long go kam long wan wan ples bilong ol.

Long bipo ol lain antap long Kurumbukari na ol viles manmeri arere long Ramu i save yusim kanu long katim wara i go long hapsait na bihain wokabaut longpela hap tru bihainim



Ramu NiCo MCC i no pilai pilai, em i minim bisnis stret bikos kampani wokim ol bikpela haus tru wantaim ol bikpela haus tru wantaim ol bikpela ain na simen.

bus rot i go long Usino maus rot na kisim PMV na go long Madang long kisim ol sevis.

Sampela ol nupela ol bilding long faktori bilong Ramu Nico long KBK na tu long Basamuk em i narakain tru. Tru tumas, sampela long ol bilding o bikpela haus ya em yu i no inap long lukim long arapela hap insait long Papua Niugini. Ol i sain gut tru insait long bus long Ramu NiCo projek eria long KBK.

Dispela bikpela nikel projek insait long PNG i givim wok long ol lokal pipel, husat bipo i save painim hat long wok. Nau ol dispela pipel i lainim sampela save long wok. Dispela ol save ol i kisim i ken helpim ol bihain long wan wan komyuniti bilong ol.

Ramu NiCo (MCC) i mekim gutpela komyuniti sevis wok long ol projek eria bilong en insait long Usino-Bundi na Raikos distrik. Prodaksin bilong projek i no kamap yet, nau em kontraksin i go het yet na klostu bai pinis. Tasol Ramu NiCo i mekim planti gutpela komyuniti sevis long sait bilong edukesin taim em i wokim kamap HOPE skul bilong ol pikinini long Kuiu na Naru na tu sapotim

helt, spots na ol arapela komyuniti sapot sevises.

I no long taim i go pinis ol wokman meri bilong Ramu Nico, husat i save wok long KBK i kisim nupela stail yunifom. Dispela yunifom em orens na blu. Dispela kala orens i sain stret na i go gut tru wantaim retpela o orens kala bilong graun long Kurumbukari. Kala bilong yunifom ya i sain nais tru na sapos yu lukim longwe yet bai yu paul olsem em nikel i wokabout o man? Sampela tu bai mangal stret long dispela stail yunifom bilong Ramu NiCo (MCC) i raun insait long bus na maunten bilong KBK.



Intanesenel stendet sip bris long Basamuk bai kisim ol bikpela ovasis sip.

## RAMU NICO Ramu NiCo redi long givim

Insait long moa long tupela yia, Ramu NiCo i sanapim pinis multi bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

**Ol dispela namba i soim klia mak bilong wok mipela i pinisim:**

- Moa long 4.5 bilion kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**Wanpela  
Ramu NiCo,  
Wanpela  
Komyuniti**



# Benk na NGO strongim grin progrem

“PLES bilong yumi, taun bilong yumi, na yumi mas lukautim. Olsem na pipia i mas go long ples bilong en na i noken mekim nabaut na rabisim ples bilong yumul.”

Em ol bikpela toktok i kam long menesa bilong Kundiawa brens bilong Benk Saut Pasifik (BSP), Albert Seri las wik Fraide, taim benk i mekim bikpela ‘Go Grin’ progrem na klinim olgeta pipia long Kundiawa taun.

Mista Seri i tok moa long taim bilong lonsim olsem ol bikpela manmeri i mas soim ol pikinini long pasin bilong tromoi pipia long ples bilong tromoi pipia stret.

Em i tok Kundiawa i no bikpela taun, na olgeta i mas lukautim na mekim i mas kamap olsem wanpela gutpela na klinpela taun, we sampela gutpela luksave i mas kamap long ol manmeri i kam long ol arapela provins na ol ovasis lain.

Em i askim tu olgeta kampani i

wok bisnis long Kundiawa long wokbung na bihainim ol gutpela rot na pasin bilong tromoi pipia na mekim taun i klin liklik.

Progrem kodineta bilong BSP Go Grin, Jacky Bal, i tok dispela em bai kamap olgeta yia na mekim ples Kundiawa taun i mas klin na mekim ol manmeri i mas save long lukautim.

Misis Bal i tok ol provinsal gavman na ol atoriti i kisim singaut long wokbung, tasol i nogat bekim.

Olsem na ol i wokbung gut wantaim ol non gavman ogenaisesen na ol komyuniti grup long strongim dispela progrem.

Progrem Kodineta bilong Komyuniti Dvelopmen Ejensi (CDA), wanpela NGO grup long Simbu we i wok wantaim BSP Kundiawa, Chris Kia, i tok strong long ol kampani i stap long Kundiawa taun i mas lukautim olgeta pipia bilong stua bilong ol yet.

Em, i tok dispela pasin bilong

mekim nabaut long olgeta pipia i soim olsem i nogat wanpela loa o man i no toktok na nogat mekim-save i kamap, na dispela pasin i go bikpela.

“Simbu gavman, ol kampani, na olgeta manmeri bilong Simbu, i mas soim tru pasin olsem em i taun bilong yumi, na yumi yet i mas senisim pasin bilong tromoi pipia na spetim buai long olgeta hap. Em yumi yet i bagarapim yumi yet,” Mista Kia i tok.

## Nupela bred i gat marasin bilong helpim bodi

YUMI save olsem bret em i kaikai we ol i save mekim long flawa na i save tes gutpela tru wantaim bata na ol arapela gutpela kaikai yu putim insait long en.

Tasol nau i gat bret we i ol marasin bilong helpim bodi bilong yu.

City Pharmacy Group (CPL), wanpela bikpela kampani we i gat planti stua long Papua Niugini, kamapim dispela nupela kaikai.

I gat 5-pela kain bret ol i mekim na wanwan i gat marasin bilong helpim wanwan

wok bilong bodi bilong yu bai yu ken kisim strong na tu yu no inap kisim sik.

CPL i lonsim dispela ol bret las wik long ol Stop ‘N’ Shop stua bilong ol insait long Mosbi na bai go aut tu long ol arapela stua bilong CPL long kantri tu.



NUPELA KAIKAI: Christina Wolstenholme (lephan) na Anthony Yan bilong CPL i soim sampela long ol nupela bret ol i salim las wik. POTO: Andrew Molen.



### Buai na pinat bilong Kokopo

**EM NAU:** Prais bilong buai long Kokopo, long Is Nu Briten i no bikpela, na dispela mama i amamas tasol long salim buai bilong em long bikpela Kokopo maket. Na maski das i bin karamapim dispela ples, kain samting olsem pinat em i gat nem long Kokopo. Dispela meri i soim ol mekpas pinat i save pulap long Kokopo maket olgeta de.

Oi Poto: Sape Metta

# HOLY LAND *tours* ISRAEL & JORDAN

10 NIGHTS & 11 DAYS

FROM

K9499\*

PP

PACKAGE INCLUSIONS: Return airfares Port Moresby to Jordan via Singapore and Colombo, twin share accommodation in Jordan, Israel, Colombo and Singapore, airport transfers, meals where specified, all tours and fees, taxes and surcharges.

CHECK OUT THESE AMAZING HOLY LAND ATTRACTIONS

- > The Sea of Galilee > Nazareth > Church of St Joseph > Ein Karerit
- > The Wailing Wall > Church of the Holy Sepulchre

Call toll free on 180 3444 or contact your nearest

Air Niugini Travel Centre or Travel Agent to secure your Holy Land Tour

\* Price based on a triternum of 15 persons. Price is per person and subject to change and availability. Strict conditions apply.



**KALAP:** Pilaia bilong Cosmos (Ilephan) i resis wantaim straika bilong Kokoda Warriors long gem bilong ol long Mosbi soka resis las wik Sande. Cosmos i win 2-0. **POTO: Andrew Molen.**



**TROFI:** Ryan Pini soim ol medol em i winim long Pasifik gems dispela yia. Em i bung wantaim BSP las wik long sainim wanpela nupela sponsasip wantaim ol. **POTO: BSP.**



**SALENS:** Tupela mangi pilai soka insait long Just Play festival bilong PNGFA we i kamap long Mosbi las wik Fonde. **POTO: PNGFA.**



**AMAMAS:** Wanpela sapota i apim Lua Mavara bilong City Pharmacy Rebels bihain long ol i winim Paramana long Mosbi gren fainol las wik Sarere. **POTO: Nicky Bernard.**

**TOKSAVE:** Salim ol spots dro bilong yu kam long Feks; 325 2579, e-mel; [amolen@wantok.com.pg](mailto:amolen@wantok.com.pg) o kam lusim long Wantok Niuspepa opis long Central Waigani, NCD.

# Springboks bai was long "Samoan Bulldozer"

**WINGA bilong Samoa, Alesana Tuilagi em man ol i save kolim Buldosa bilong Samoa (Samoan Bulldozer).**

Taim em i pilai wanpela trail gem bilong ol Sharks insait long Supa Ragbi (Super Rugby) 4-pela yia i go pinis, ol i no bin inap long painim wanpela yunifom siot we i bikpela inap long em i werim.

Em i bikpela man tru na i gat spit, ol arapela tim

i save painim hat long holim em taim em i kisim spit bilong em na i ron stret long ol.

Dispela Fraide bai Samoa i bungim wol kap sempion, Saut Afrika na Tuilagi em i wanpela man ol Springboks i tok long was long em long laspela Pul D gem bilong ol.

Kosa bilong Springboks, Dick Muir i bin kosa bilong ol Sharks long 2007 taim em i askim Tuilagi long kam pilai long

dispela trail gem wantaim ol na i save long gem bilong em.

Muir nau i wok long kamapim wanpela kain gem plen long pasim Tuilagi, husat hevi bilong em inap 121kg, na tu ol arapela wanpilai bilong em.

Saut Afrika i mas kisim wanpela moa poin long bungim Australia long kwata fainol na Samoa i mas win wantaim bikpela poin long go moa yet insait

long dispela resis.

"Em i soim ol-geta hap em i pilai long owl olsem em i wanpela gutpela na strongpela pilaia tru olsem na mipela i mas pasim em gut, mipela i gat tingting long mekim dispela," Muir i tok.

Muir i tok ol i mas winim dispela gem long go insait long fainols resis na ol bai wokhat tru long en.

Tim bilong Saut Afrika em: Tendai Mtawarira, Bismarck Du Plessis,

Jannie Du Plessis, Danie Rossouw, Victor Matfield (c), Heinrich Brüssow, Schalk Burger, Pierre Spies, Fourie Du Preez, Morné Steyn, Bryan Habana, Frans Steyn, Jaque Fourie, JP Pietersen, Pat Lambie, Risev: John Smit, G u r t h r ö Steenkamp, CJ van der Linde, Willem Alberts, Francois Louw, F r a n c o i s Hougaard, Jean De Villiers.



STOPIM EM: Springboks laik pasim gut Tuilagi. POTO: [www.rugbyworldcup.com](http://www.rugbyworldcup.com)



PRETIM OL: Fiji tim i wokim pait danis bilong ol "Cibi", bipo long gem bilong ol agensim Saut Afrika las wik. POTO: [www.rugbyworldcup.com](http://www.rugbyworldcup.com)

## All Blacks bai apim gem bilong ol

NU Silan i gat wanpela bikpela gem agensim Kanada long Sande tasol long wankain taim, ol bai traime save na strong bilong ol yet long luksave long gem bilong ol.

Astingting bilong Nu Silan em long traime na apim strong bilong gem bilong ol yet bipo long ol i go insait long ol fainols resis.

Asisten kosa bilong All Blacks, Wayne Smith, i tok ol bai tingting long bungim wanpela strongpela salens i kam long Kanada tasol long wankain taim ol bai lukluk long gem bilong ol yet tu.

Em i tok ol i laik pilai gut moa long gem bilong ol agensim Frens we ol i bin win 37-17.

"Mipela bai pilai agensim Kanada na long wankain taim bai mipela i pilai agensim mipela yet tu," Smith i tok.

"Mipela i mas wokhat na stretim ol eria we mipela i no bin mekim gut tumas long en agensim Frens," em i tok.

Smith i tok tu olsem ol i luksave long sampela ol strongpela pilaia bilong Kanada olsem tupela flenka Chauncey O'Toole na Adam Kleeberger na namba 8,

Aaron Carpenter.

"Senta bilong ol, van der Merwe, em i wanpela gutpela man bilong ronim bal tu, i luk olsem ol i pilai long sampela bikpela tonamen na i gat inap save na strong long pilai tu," em i tok.

Smith i tok dispela gem bai strong tru tasol ol i gat sampela ol pilaia bilong ol husat i kam bek bihain long ol i orait long ol bagarap bilong ol.

"Dispela ol lain bai strongim tim oslem na mipela i redi tu long bungim Kanada," Smith i tok.



PES: Tupela Nu Silan sapota i soim kalsa bilong ol long ragbi wol kap long Nu Silan. POTO: [www.rugbyworldcup.com](http://www.rugbyworldcup.com)

# Lockyer stap long skwat laspela taim

**DARREN Lockyer i go insait long Australia Kangaroo skwat bi-hain long ol Broncos i pinis long fainols resis las wik.**

Em i wanpela long 12-pela pilaia husat ARL i putim i go insait long skwat.

Lockyer wantaim narapela 7-pela wan-pilai bilong em long Broncos, i go insait long skwat we bai stap insait long 4 Nesens resis long Oktoba dispela yia.

Dispela 7-pela pilaia em Matt Gillett, Ben Hannant, Justin Hodges, Josh McGuire, Corey Parker, Sam Thaiday na Jharal Yow Yeh

Narapela 4-pela i kam long Melbourne Storm, Cooper Cronk, Dane Nielson, Billy Slater na Cameron Smith.

Ben Creagh na Brett Morris bilong St George Illawarra i lusim skwat bilong wanem ol i kisim bagarap.

Dispela bai laspela taim bilong Lockyer tu long makim kantri bilong em na ol i gat strong-pela tingting long kamapim gutpela salens long dispela tonamen.

Tasol em bai no inap isi taim ol i bungim Nu Silan, husat bai gat planti ol pilaia i kam long Warriors tim we bai pilai insait long NRL gren fainol dispela Sande.



GO YET: Lockyer stap long Kangaroo skwat.

## Manly bai traim stopim

*I kam long bek pes*

“Em i ken givim mipela moa strong na save long pilai wantaim bikpela presa bilong kain gem olsem,” Rodney i tok.

“Planti bilong mipela i save long wanem samt- ing long mekim long dispela wik i go inap long de bilong pilai olsem na dispela bai helpim ol wok redi na gem bilong mipela gut tru,” em i tok.

Tasol em bai no inap isi tu bilong wanem Warriors i gat ol bikpela pilaia we i ken brukim banis bilong Manly na dispela em i wanpela samt- ing ol i tingting planti long en tu.

Biknem ragbi lig komenteta, Peter Sterling i tok gem bilong dispela tupela tim i klostu wankain long las tripela gem ol i pilai.

Em i tok ol i tromoi bal na i no stop long mal- olo na kisim win.

Tim husat i sanap strong moa long narapela na banis bilong en i no bruk tumas bai winim dis- pela gem.

Manly lukluk long ekspiriens na gutpela pilai bilong ol tasol ol Warriors i gat moa strong na tu strongpela tingting long soim ol arapela tim olsem ol tu i no kamap nating long gren fainol.

# Manly laik makim Vatuvei wantaim bom

MANLY gat tingting long makim winga bi- long Warriors wan- taim ol bikpela bom kik tasol Manu Vatu- vei tok, em i redi tasol long dispela salens.

Kepten bilong

Manly, Jamie Lyon, i tok winga bilong War- riors, Manu Vatuvei mas was gut bilong wanem ol bai putim planti bikpela bom kik i go antap long em long NRL gren fainol

gem bilong ol dispela Sande.

Manly na planti ol arapela tim i luksave olsem Vatuvei bin painim hat liklik long kisim ol bikpela kik long namba wan wik

bilong ol fainol resis taim Warriors i bin pi- laim Brisbane Bron- cos.

Em i pundaunim planti bal long ol bikpela kik na i painim hat tu long holim gut

bal na i ron.

Vatuvei em i wanpela strongpela pilaia bilong karim bal i go antap long difens, tasol dispela hevi bilong em long kisim bal long ol bikpela kik i mekim em i kamap wan- pela mak bilong ol ara- pela tim long kik long em.

Em bai gat bikpela salens dispela Sande agensim Manly bilong tupela hap bek na faiv eit bilong Manly, Daly Cherry-Evans na Kieran Foran, i gat ol gutpela kik we i save givim hat taim long ol pilaia long

arapela tim.

“Mipela i gat ol gutpela man bilong kikim bal olsem na mipela bai mekim planti ol bikpela bom kik long dispela gem,” Lyons i tok.

“Mipela bai no inap senisim gem bilong mipela tumas bilong wanem ol samt- ing mipela i mekim dispela yia i kamap gut na i helpim mipela gut,” em i tok.

Lyons i tok Feliti Mateo, Krisnan Inu na Vatuvei tu i stap long gutpela fom dispela yia na bai givim strongpela

salens tru long ol.

Tasol tok lukaut bilong Lyons i go long Vatuvei no go nating.

Vatuvei tok em i redi tasol long wanem kain samt- ing Manly laik tro- moi long em.

“Em bai wanpela gut- pela salens bilong mi na mi save redi tasol long bungim ol nupela salens olgeta wik,” Vatuvei tok.

“Mi bai traim strong bi- long mi long pilai wan- pela gutpela gem na wanem kain ol kik ol i salim i kam long mi em bai mi traim gut long kisim,” em i tok.

**MOA BALUS PLANTI TAIM MOA IGO LONG PLANTI MOA PLES IKAM LONG LAE**

Niupela Lae	↔	Madang	Olgeta dei
Moa Lae	↔	Goroka	6pela dei long wanpla wik
Moa Lae	↔	Port Moresby	30pela taim long wanpla wik
Niupela Lae	↔	Kimbe	4pela dei long wanpla wik
Niupela Lae	↔	Rabaul	4pela dei long wanpla wik

• Gutpela moa skedual • Planti moa koneksen • Planti spes moa yet

Go long Airlines PNG Seils Opis istap klostu long yu o ringim **16111** (long Digicel fon blong you) o visitim [www.apng.com](http://www.apng.com)

**Airlines PNG**  
COME FLY OUR WAY

PORT MORESBY	- Level 1, Pacific Place, 321 3400
MT. HAGEN	- Central Highlands Printers, 542 0662 - Kagamuga Airport, 542 2732
LAE	- Micro Bank Haus, Fifth Street, 479 5980
POPONDETTA	- Top Town (opp. Memorial Park), 629 7638
ALOTAU	- Preston White Street, 641 1288
GOROKA	- Airport, 532 2532
TABUBIL	- Airport, 649 9171
KIUNGA	- Airport, 649 1125
MADANG	- Global Travel, 422 0011
KIMBE	- Kimbe Travel Centre, 983 5802
RABAU	- Rabaul Hotel, 982 1999



REDI: Vatuvei tok em i redi long salens bilong Manly.

# Sampela etlit no nap kisim win mani bilong ol

Andrew Molen i raitim

**OL Papua Niugini etlit husat i bin winim gol medol long Pasifik Gems long Nu Kaledonia i bin winim tu K82, 500 i kam long mama sponsa bilong PNG tim, Digicel.**

Digicel i bin putim tok long givim sampela mani long ol pilaia na tim husat i winim gol medol long Pasifik Gems.

Ol i tok long givim K1500 long wanwan gol medol wanpela etlit i winim na K3000 long wanpela tim husat i winim gol medol long spot bilong ol tu.

10-pela bilong dispela ol etlit i kisim mani bilong ol long Digicel dispela wik.

Digicel PNG Operations Director, Lorna McPherson i tok ol arapela bai kisim mani bilong ol long ol wik i kam.

Tasol long wankain taim, McPherson i tok, sampela etlit bai no inap kisim mani bilong ol bilong wanem ol i gat ol arapela sponsa husat i no tok orait long ol.

"Mipela i no kros long ol sponsa i no tok orait long i kisim mani bilong ol, em i orait, olgeta etlit i ken kisim wanem kain sponsa ol i laik.



**DIGICEL GOLD: McPherson (lephan) wantaim sampela ol etlit husat i kisim mani bilong ol long gol dispela wik Tunde. POTO: Andrew Molen.**

"Tasol dispela em mani ol i wokhat na i winim olsem na em bai stap inap long wanem taim ol i laik kam kisim," McPherson i tok.

Ol etlit husat i kisim mani bilong ol em; Mowen Boino (hedols), Nelson Stone (400m resis), Jack Viyufa (bodibilding), Jack Willie (boksing), Melissa Turia (karate) na ol pawalifita, Kalau Andrew, Melissa Tikio, Meteng Wak, Livingston Sikoli

na Linda Pulsan.

Olgeta i tok amamas long Digicel long dispela helpim.

"Dispela kain sponsa i gutpela long helpim mipela ol etlit bilong wanem planti bilong mipela i nogat wok.

"Mipela i ken yusim dispela mani long helpim trening na wokabaut bilong mipela na tu long lukautim mipela na ol femili bilong mipela tu," Jack Willie i tok.

"Mi amamas long Digicel na mi laik tok tenkyu tu long dispela program bilong ol," Linda Pulsan i tok.

Melissa Turia, husat i pilaim namba wan Pasifik Gem bilong em, tu i tok amamas bilong em long Digicel.

"Mi amamas long makim kantri bilong mi na winim gol medol na mi tenkyu long luk-save bilong Digicel," em i tok.

## Australia pretim ol ston long pilai graun

**AUSTRALIA** Praim Minista's 13 tim we i pilaim ol Kumuls long Lae las wik i bin wari long ol ston na arapela samting we ol sapota i tromoi go insait long pilai graun.

Ol Praim Ministas XIII i bin winim Kumuls 36-22, insait long wanpela strongpela gem tasol autsait, long pilai graun, planti arapela hevi bin kamap we i

mekim ol i stopim gem liklik taim tu.

Ples bilong sindaun i pulap tru na long autsait, i gat planti moa manmeri stap yet husat i wok long traime long kam insait.

Ol i brukim banis i kam insait na polis na arapela sekyuriti wokman i traime hat long pasim ol.

Polis i sutim ges na pairapim

gan tu long pretim na ronim ol tasol dispela hevi stap inap long gem i pinis.

Kepten bilong Australia, Nathan Hindmarsh i tok, ol i no wari tumas long pairap bilong gan tasol ol i tingting planti long ol ston na arapela samting i pundaun insait long pilai graun.

Tasol em i tok, ol i save long gem bilong ol Kumuls na i redi

long en taim ol i kam.

"Mipela i save olsem ol i lain bilong takol na bam strong tru olsem na mipela i redi na was gut long dispela.

"Ol fowet bilong mipela i lukaut na ron gut long dispela kain ol bikpela takol na bam na i helpim mipela long sanap strong agensim ol," Hindmarsh i tok.

## Rebels winim namba wan taitol long Mosbi

**CITY Pharmacy Rebels** long las wik Sarere, i winim namba wan primia sip taitol bilong ol long Mosbi netbol resis.

Ol i kamap ol nupela sempion bilong Mosbi netbol resis bihain long ol i daunim ol sempion bilong las yia, Monier Paramana, 50-46 long Rita Flynn kot long Bisini.

Rebels i bin kam insait long Mosbi netbol resis 15 yia i go pinis na dispela em i namba wan taim bilong ol long go long gren fainol na tu long winim.

Kepten na gol suta bilong Rebels, Lua Rikis, i go pas long ol long kisim ol points na helpim tim i go pas long gem tasol em i kisim bikpela helpim tu i kam long ol arapela wanpilai bilong em husat ol tu i no malolo long pilai.

Strongpela gem bilong Rikis i lukim em i winim awod olsem nambawan pilaia insait long fainols resis dispela yia.

Em i kisim gutpela sapot tu long ol wanpilai olsem Ralai Benedict, Kila Rawali, Winnie Mavara, Marinama Maha, Kalya Taule na Walo Taputu, long pasim gut ol meri Paramana long skoa moa.

Tasol win bilong ol Rebels i no kam isi tu.

Paramana i kamapim strongpela gem tu we i lukim Gewa Raula, Marie Otio, Kula Iamo, Vavine Thoa, Susan Wellington, Mareta Iamo na Ravu Raula i no givim sans long ol Rebels.

Na long hap taim, skoa i bin stap 23-23.

Ol Rebels i kalap i go pas tasol long namba tri kwata bilong gem taim Rikis na Benedict i stat long putim planti gol na i no abrusim mak bilong ol.

Tim menesa na kosa bilong Rebels, Emily Taule, i amamas tru long namba wan gren fainol na tu win bilong ol.

"Ol meri bin tingting strong na

lukluk long winim dispela gem na mipela i amamas olsem hatwok bilong i no go nating," Taule i tok.

Grup maketing menesa bilong CPL Group, Prue Go, i tok CPL, husat i mama sponsa bilong Rebels, i amamas tu long dispela gutpela rekot ol i mekim.

"Dispela i gutpela yia bilong CPL long sait bilong spots, ol Rebels em sempion bilong Mosbi nau na long ragbi lig, narapela tim bilong mipela, Stop 'N' Shop Vipers i stap insait long fainols tu bilong Digicel kap," Go i tok.

CPL Group em i wanpela bikpela bisnis insait long kantri we i save lukautim planti ol bikpela stua na supamakem olsem Stop "N" Shop, Hardware Haus, City Pharmacy, Bon Café na Paradise Cinema we ol bai opim liklik taim insait long Vision City long Mosbi.



**WIN: Ol Rebels i amamasim win bilong ol bihain long gem. POTO: Nicky Bernard.**

**SPOT RAUN**  
WANTAIM  
Scott Vavine, ML



**PNG Sports Federation Olympic Committee na PNG Sports Foundation i mas statim wok nau**

2015 PASIFIK Gems i no stap longwe na i luk olsem yumi stap baksait pinis long ol wok redi bilong yumi.

I gat planti samting i stap yet we yumi mas lukluk long en long stretim na redim bipo long gem i kamap.

I gat 4-pela yia tasol i stap nau na i no luk olsem wanpela wok i kamap yet, yumi stap longwe yet long lukim dispela ol samting i kamap.

Tingim, wok bilong mekim ol bikpela haus long ol pilai graun, ples bilong silip na ol ofis bilong gem, i no inap kamap insait long 24 hawa tasol.

Dispela em ol bikpela wok na i save kisim longpela taim long mekim ol, olsem na yumi noken wet moa, ol wok i mas kamap nau.

Long wankain rot, trening na wok redi bilong ol pilaia i save kisim longpela taim long redim ol gut bilong dispela kain bikpela pilai.

Ol i mas i gat inap taim tu long bungim mani na arapela risos bilong mekim dispela ol samting.

Olsem mi tok pinis long hia i no long taim i go pinis, yumi nogat moa taim long sindaun na wet i stap.

Yumi mas mekim wanpela samting nau bipo long taim i pinis.

Olgeta kantri na manmeri long Pasifik na wol i putim ai long yumi nau sapos yumi bai nap long kamapim wanpela gutpela gem gen olsem long 1991 Saut Pasifik Gems.

Gem bai kam long kantri bilong yumi olsem na yumi noken tingting long kam namba wan, tu o tri, nogat, tingting bilong yumi mas pas tasol long nambawan ples.

Ol bikpela spots ogenaiesen bilong yumi mas wok hat nau long trenim na developim ol etlit na ofisol bilong yumi.

Yumi mas lukluk long ol samting we ol i no mekim gut tumas long 14 Pasifik Gems we i kamap long Nu Kaledonia dispela yia na stretim ol etlit na ofisol bilong yumi long redi long 2015.

Ol samting we yumi gutpela long en, em strongim ol moa long dispela ol eria.

PNG Sports Federation nau i mas luksave long dispela ol eria hariap na olgeta i mas lukluk long stretim ol nau.

Wanpela bikpela eria we mi yet i laik lukim ol i mekim wok long en em trening na developim bilong ol etlit na ofisol.

Dispela mas kamap tu insait long ol wok redi bilong 2015.

Bihain long ol i luksave na painim ol gutpela etlit, ol i mas putim ol i go insait long sampela bikpela trening program.

Em bai gutpela long salim ol i go trening long ovasis bai ol i ken kamapim ol gutpela mak long gem bilong ol.

I gat planti gutpela piksa long ol kain trening program we i helpim ol etlit na tim bilong yumi olsem long etletiks na weightlifting.

Sapos yumi nap, salim olgeta etlit bilong yumi go trening ovasis.

Em i gutpela tingting long mekim dispela kain program tasol bikpela askim em, husat bai sapotim dispela program?

Dispela em i wok bilong tupela spots ogenaiesen bilong yumi long lukluk long en.

Tupela i mas painim ol mani na arapela risos bilong mekim em i kamap.

Ol nesenel spots federesen bilong wanwan spot tu i mas bihainim wanem samting PNG Etletiks Yunion (PNGAU) i mekim, na salim ol pilaia bilong ol i trening moa long ovasis.

Dispela em i wanpela samting we i kamap tai mol i bin redi long resis long 1991 tu.

Long dispela as, mi wok long toktok long yumi mas lukluk gen long sampela ol samting yumi bin mekim long 1991 Saut Pasifik Gems, we i bin helpim yumi gut long winim dispela gem.

Yumi olgeta i mas tingim dispela ol amamas na gutpela tingting long 14 Pasifik Gems long Nu Kaledonia dispela yia, i pinis nau na yumi gat planti moa hatwok i stap long redi gen bilong

# DIANA

**Now Bigger at 425g**

- ✓ Wankain Teist
- ✓ Wankain Prais
- ✓ Plenti Mit



Proudly PNG MADE  
Manufactured by  
RD Tuna Cannery Limited



**Niupela piksa tasol wankain mit**



# Ron bilong Warriors



## Manly bai train stopim

**NOGAT man i save olsem ol Warriors bai go insait long Gren fainol dispela yia.**

Nau, i gat tupela moa de i stap bipo long ol i go insait long namba tu NRL gren fainol bilong ol.

Laspela taim ol Warriors i go long gren fainol em long 2002 agensim Sydney Roosters we ol i bin lus 20-8. 2002 em i yia we ol Warriors i bin winim tu maina primiasip taitol na pinis long namba wan ples bipo long

fainols i kamap.

Ol i go moa yet bipo long ol Roosters i stopim ol long gren fainol.

Nau ol i wokhat gen long sisen na i pinis long namba 6 ples bihain long 24 raun bilong gem.

2011 bilong ol i no stat hariap tumas tasol klostu long pinis bilong yia, ol i paia strong na i winim ol gem long kisim mak bilong ol i kam antap.

Long namba wan wik bilong fainols, ol i lus long

Brisbane Broncos tasol i kam bek strong long winim ol Tigers na bihain ol Storm.

Gutpela ron bilong ol i stap yet na sapos ol i pilai wantaim wankain strong na tingting, em bai ol i gat sans long winim namba wan NRL taitol bilong ol.

Tasol Manly i tok, wanpela samting ol i gat we i ken daunim ol Warriors em ekspiriens na save bilong pilai long dispela bikpela gem.

7-pela pilaia long Manly tim i no bin pilai long gren fainol bipo tasol ol narapela i smelim dispela mak pinis na i hangre long mekm gen.

Fowet bilong Manly, Shane Rodney, husat i winim wanpela gren fainol wantaim Penrith long 2003, i tok, dispela em i wanpela bikpela samting we i ken helpim ol.

*I go moa long pes 26*

LUKAUT: Kepten, Simon Mannering (Ilephan), Shaun Berrigan, Krisnan Inu na Feleti Mateo bai kamapim bikpela gem bilong ol Warriors.

# Johnston's Pharmacies



**For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.**

**All Sport and First Aid requirements.**



**P.O.Box 1066 Boroko.  
Phone 325 3185. Fax 325 0190.  
Email sales@johnstons.com.pg."**